

## HIBELIU tovetumagana yadi leta

Hida leta ma miYuda Yesu Keliso againe hivetumagana-ma yadi leta. Bonadi ana egana Hibeliu ada tamo tova kavewagadi Hibeliu kaliva, tu hida leta hakwadi gi'etoladina-ma keke kadahalamaneni fa'ina to'etoladi ana egana keke gidayakahini.

Badi Hibeliu tovetumagana ve'umagigi hinuhagana fa'ina, hinuwanuwa vaita yadi tafalolo tuwaina Mosese yana vehimeya amine hinayewadi. Fa'ina leta ana to'etoladi nuwanuwana ginavehawaledi Yesu ana tafalolo yadi tafalolo-vehimeya tuwaina gitubutagona. Bana Yesu Yaubada Natuna badi lobama ana tovenuwa'ata kadu falofita kadu Mosese gikaiwabuhege-mo'edi. Mosese yana vehimeya ana idibumuhiga kadu abaveyao tulina tulina ana sewadi agaidiya keke veyao-vagata adifai-weya hinanuhagani. Gaitomai-dina vaita koyona ana aba'aiyawela-mo'a Yesu yana alikeya gilakayemu-ma anunudi amine. Yesu yana alika moya'aida yada koyona ana aiyawela anafata-vagata. Ada Bana yada abaveyao ana tofaisewa kikaiwabuna Yaubada i'atagine ide fa'ideya gimiyamiya-vagata fa'ina, tafalolo-vehimeya tuwaina kanahegena tu Yesu ana vetumagana againe kanave'asevatu. Leta dobona hidede amine.

Keliso Yaubada yana nuwanuwa kadu ana ita'ita ana to'ivemogatala-mo'a. 1:1-4

Keliso Yaubada yana tovenuwa'ata gikaiwabuhegedi. 1:5-2:18

Keliso badi Mosese Yosua gikaiwabuhegedi. 3:1-4:13

Keliso mali abaveyao ana tofaisewa gikaiwabuhegedi. 4:14-7:28

Veyao ivaguna Keliso giyemaunena-ma veyao tuwaina gitubutagona. 8:1-9:28

Keliso dayagina yomuyomu dayagidi gitubuhegena be abaveyao-nadi koyona ana aiyawela anafata. 10:1-39

Vetumagana eda hagihagi-mo'ena. 11:1-40

Yesu ana vetumagana kadu ana idibumuhiga againe kana'atuvefa'ila. 12:1-13:19

To'etoladi yana lukafoi. 13:20-25

*Yesu Tokikaiwabu-mo'a Yaubada yana nuwanuwa*

*ide agaideya gihawavemogatalena.*

<sup>1</sup> Tova tuwai-mo'ena Yaubada yana nuwanuwa ana tufo ana tufo amine ide miIsileli bwanenedeyao agaidiya givehavehawaledi. Tova sa'eyana eda sa'eyana amine yana nuwanuwa gihawavemogatalena, kadu tova sa'eyana yana nuwanuwa ana hawavemogatala kadu eda tulina amine giseyemaunena. Ada yana nuwanuwa badi bonana ana to'awatalatalaina agaidiya gihawavemogatalena be bwanenedeyao agaidiya hi'awatalatalainena. <sup>2</sup> E, tova tuwai-mo'ena Yaubada bonana ana to'awatalatalaina awadiya gigahē, tu tova adamoya higa hida tova havahavaina againe yana nuwanuwa Natuna awane ide tovetumagana agaideya gihawavemogatalena. Boi tuwai-lokalokana Yaubada yana nuwanuwa Natuna givelena be gaitoma matatabudi babiya kadu lobameya gibubudi. Ada kadu boi tuwai-lokalokana Yaubada Natuna givegidenā be gaitoma moya'aidi ginavehimeye-'owodi fa'ina.

<sup>3</sup> Kauwana yana mahalina kelasi againe kakivilavilana be give'akinamanamalena amine, Bana Yaubada Natuna Yaubada yana mahalina ve'akinamanamalina gi'l'iveyemaunina. Ada Yaubada ana ita'ita amine meda anafaiweya Natuna ana ita'ita, au anunudi sa'eyana. Ada Yaubada Natuna gaitoma moya'aidi lobameya kadu

babiya bonana fifiwalana againe gisedonedi be yana ve-himeya againe givefota-vagahidi kadu gi'ita'itave'avidu. Bana'e yada koyona ana aba'aiyawela ana eda Tauna gifaisewani-yo lobameya gilaka, Yaubada Tokaiwabu-mo'a i'atagine givetoga. E, abavetoga kikaiwabuna Yaubada i'atagine givetoga be higa abavehimeya lakahina givaina. <sup>4</sup> Yaubada i'atagine givetoga-yo badi lobama ana tovenuwa'ata moya'aidi gikaiwabuhegedi. Lobama ana tovenuwa'ata adi egana lakahina tu Yaubada egana kikaiwabu-mo'ena Natuna givelena. Fa'ina Natuna ana egana tovenuwa'ata adi egana gikaiwabuhegena amine, Bana Tauna gikaiwabuhegedi.

*Yaubada Natuna lobama ana tovenuwa'ata gikaiwabuhegedi.*

<sup>5</sup> Gavana fa'ina Yesu lobama ana tovenuwa'ata gikaiwabuhegedi? Fa'ina Yaubada Yesu tuwai-lokalokana gimiyamiya-vagata ma fa'ine Veyao Tuwaina ana bukiya gigahe gigayo,  
O'eni Natuku.

Adamoya gahawavenatune.

Kadu gahe sa'eyana buki-nadi againe Natuna fa'ine gilukahihi gigayo,  
Iya Bana Tamana,

Kadu Bana Iya Natuku.

Mena gahe ma keke lobama ana tovenuwa'ata sa'eyana againe gidagahe, keke-mo'a. Bana Natuna anakaibe fa'ine hidede amine gigahe. <sup>6</sup> Ada Natuna anakaibe'u-mo'a babiya ginaseyemaunena ana toveya, yana hobu'ela fa'ina buki-nadi againe gigahe gigayo,  
Omi lobama ana tovenuwa'ata  
ami yo'o moya'aimi wanahawadavadavana.

Au hidede amine Yesu gikaiwabuhegedi. <sup>7</sup> Tu badi lobama ana tovenuwa'ata au kikaiwabudiyao ma kahalamanena fa'ina Veyao Tuwaina ana buki gigaheyedi gigayo, Yaubada yana tovenuwa'ata givehimeyedi be bolimana ana ita'ita amine hivenuya.

Kadu yana tofaisewa lobameya givehimeyedi be ai noya'aina ana ita'ita amine hivenuya.

<sup>8-9</sup> Yaubada lobama ana tovenuwa'ata adi ita itadamadamana ma fa'idiya au hidedemi gigahe. Bana Natuna ana ita miyamiya-vagahina ma fa'ine buki-nadi gigahe gigayo,

O'eni Yaubada. Ya didiga'u'u kikaiwabuna, keke ginahavaini, au ginaduva-vagata.

Ya yo'o agaidiya uvehivehimeya,

E, uvehivehimeya tunutunugi-vagahina.

O nuwanuwa lakahina dewa tunutunugina,

Keke nuwanuwa dewa koyona, keke-mo'a.

Hidedemi unuwanuwa fa'ina

Iya Yaubada, higa ya Yaubada,

a egana gakilakahi-mo'ena,

bunama ana egana vemwamwala

againa gabunami be higa unavemwamwala-mo'a.

E, tobohiyamomo adi waegana hivemwamwala,

atu O'eni ma uvemwamwala-mo'a.

<sup>10</sup> Kadu Yaubada yana gahe sa'eyana Natuna fa'ine ma gigayo,

Ho Kaiwabu, boi tuwai-lokalokana

babi ana abave'inuba againe

ya nuwanuwa amine babi ububuna

kadu lobama ana aibubuna O nima.

<sup>11-12</sup> Aimo lobama kadu babi hinayawowola,

Tu O'eni umiyamiya-vagata.

Kaleko ginadauda tu ginakoyo-mo'a amine  
lobama kadu babi aimo ginakoyo.  
Lifi tuwaina gikoyo-mo'a ma  
ka'uwana be kahegena amine,  
hida lobama kadu babi aimo yogo amine unahegedi  
be lobama babi adi ita tulina unaseyemaunedi.  
Atu O'eni ma a ita'ita keke tulina ginalakayemu.  
Fa'ina tuwai-mo'e umiyamiya-vagata amine,  
meda anafaiweya tova mulina unamiyamiya-vagata.  
Yawaini ana aituha keke, keke-mo'a.  
<sup>13</sup> Kadu tuwai-mo'ena Yaubada buki-nadi againe gigahe  
gigayo,  
Nima i'atagikuya unahiyoto. O unamiyami  
tu nibaimomo ageyafayafaniya ganasedi.  
Hidemi gigahe tu keke lobama ana tovenuwa'ata sa'eyana  
againa hidede amine gidagahe. Au Bana Natuna anakaibe  
againa hidede amine gigahe. <sup>14</sup> Yaubada Natuna au  
kikaiwabu-mo'ena tu lobama ana tovenuwa'ata ma adi  
egana tofaisewa. Yaubada fa'ina hififaisewa. Badi keke  
wawowodi, au alu'aluwadiga tu Yaubada gi'iveninisedi be  
badi kaliva Yaubada ginakibababaledi-ma hinavelugadi.

## 2

### *Yaubada bonana yana kibababala fa'ina kanavenogalena.*

<sup>1</sup> Yaubada yana nuwanuwa Natuna awane  
gihawavemogatalena fa'ina, Yaubada bonana kanogalina-  
ma nuwadeya kanasena be kanakidonena. Hidede  
amine kanakidonena be bolimana waka ma'inuwana  
ma'inuwana gi'alu'alugena amine, Bana bonana keke  
nuwada ma'inuwana ma'inuwana ginaulu'ulu. <sup>2</sup> Boi  
tuwai-mo'ena Yaubada yana vehimeya lobama ana  
tovenuwa'ata awadiya kaliva lakahina ana egana Mosese

givelena. Tovenuwa'ata awadiya gilakayemu ada au gahe velemo'ena ma kahalamanena, ada hai kaliva mena vehimeyai-nadi giyawelina o ka'i gikilowena, medema yana dewa fatana higa matahiwadi ginuhagana. <sup>3</sup> Atu tova adamoya keke lobama ana tovenuwa'ata au Kaiwabu Yesu kibababala ana eda givehawaleda. Mena kibababala ma gaitoma lakahina. Ka'i Kaiwabu yana gahe kibababala fa'ina kanaluhegehegena digo, keke adafaiweya yada dewa ana laufata kana'oseni, keke-mo'a. Bana Kaiwabu Yesu kibababala ana eda fa'ina gimidivehawala, ada muliya badi yana vehawala hinogalina-ma yana gahe hi'alakakilina. <sup>4</sup> Ada keke badi tomadunogalagaga hida'alakakila, au kadu Yaubada Tauna mena gahe kibababala fa'ina au velemo'ena giseyemaunena. Fa'ina Bana'e nimana ana iya'iyaya giseyemaunedi, ada abaveyaulowoga kadu aituha fifiwalana tulina tulina gifaisewadi. Meda anafaiweya Tauna yana nuwanuwa amine Alu'aluwa Mahalina yana abavetala, higa faiwala tulina tulina tovetumagana agaideya gifolakena be kanahalamanena yana kibababala au velemo'ena.

*Kaliva ana egana Yesu yana kaiwabu fa'ina.*

<sup>5</sup> Keke gavana fa'ina tu kaliva yada miyami aimo aituha mulina ginalakayemu againe fa'ina galulukahihi. Yada miyami mena aituheya fa'ina Yaubada keke lobama ana tovenuwa'ata agaidiya gidagahe gidagayo, “Kaliva yadi miyami aimo aituha mulina ginalakayemu againe omi wanavehimeyena.” <sup>6</sup> Lobama ana tovenuwa'ata badi keke gidasedi tovehimeya aimo aituha mulina fa'ina, tu Veyao Tuwaina ana bukiya gahe sa'eyana gidadauda higa vaita kaliva sa'eyana Yaubada againe gidagahe gidagayo, Ime tomiyababi au kabisomeyao.

Kabisomeyao tu gavadi-yo unuwa-nunauyema?

Ime kaliva ama egana keke lakahina

tu tova moya'aina uhinehinekalikaliyema.

<sup>7-8</sup> Ime kabisomeyao nonogana ukivekaiwabuma.

Lobama ana tovenuwa'ata kikaiwabudiyao

amine ime kaliva kadu kikaiwabumeyao.

Atu badi yadi kaiwabu wai ginagona,

ime yama kaiwabu ma'ita wai gimulina.

E, ime kaliva ama egana lakahina usena,

kadu yama kaiwabu lakahina uvelema.

Ada ime agaimeya ugahe ugayo,

Gaitoma moya'aidi wanavehimeyedi.

Au hidedemi Veyao Tuwaina ana buki gigahe. Ada keke vaita gidagahe ide kaliva gaitoma tufona kadavehimeyeni.

Au gigahe vaita gaitoma moya'aina kanavehimeyena.

Atu tova adamoya keke gaitoma moya'aina agevavadeya

kada'itani. <sup>9</sup> Keke gaitoma moya'aina agevavadeya kada'i-

tani, tu kaliva sa'eyana higa Yesu ka'ita'itana. Yesu

kaliva kikaiwabu-mo'ena, lobama ana tovenuwa'ata gikai-

wabuhegedi tu Yaubada yana vehimeya againe gihobu'ela

be yana kaiwabu ma'ita giyewa, ada tova kali'uhona

lobama ana tovenuwa'ata ma'ita hikaiwabuhegena. Yesu

yana kaiwabu au hidede amine giyewa be higa Yaubada

yana nuwadoga againe ide kaliva moya'aida fa'ideya gi-

na'alika. Ada alika ana aulolo golagolana ginuhagana

fa'ina, Yaubada kikaiwabu lakahina givelena kadu ana

egana gikilakahi-mo'ena. Ada au tova adamoya ide Yesu

yana wakaiwabu lakahina ka'ita'itana.

*Yesu ada nuya gi'osena be givekaliva fa'ina, ada*

*vita moya'aina agaidiya giveluvelugada.*

<sup>10</sup> Tu gaitoma moya'aina inubana Bana Yaubada ada Tauna fa'ine gibubudi. Bana'e nuwanuwana ide kaliva yana abageya ginavega'auleda be higa natuneyao moy-a'aida yana mahalina ve'akinamanamalina kananuhagana. Ide tokoyona fa'ina keke adafata Yaubada yana abageya kanaluku. Tu Yesu mena ada kibababala ana eda ana to'ihagihagi. Yesu kibababala ana faisewa ginahalamane-hagihagiyena fa'ina, Yaubada givhimeya be Yesu aulolo tagiya ginanuhagana. Yana aulolo yana tagiya againe yana halamana kaliva ada kibababala fa'ina ginatubuga-mo'a be anafaiweya ginakibababaleda. Ada mena Yaubada yana vehimeya aulolo tagiya fa'ina ana ita ma gilubodana. <sup>11</sup> Yesu ase'aseda gikola-yo gisevehaileda. Bana tosevehaila kadu ide gisevehaileda amanadi Tamada au sa'eyana. Bana'e ma Yaubada Natuna kikaiwabu-mo'ena nonogana ide gihawavetobohiyana, fa'ina Yaubada yana yo'ogaga agaidiya kaluku-yo Tamada au sa'eyana. <sup>12</sup> E, yana gahe Veyao Tuwaina ana bukiya gidadauda gigayo,

A egana kaikweyao agaidiya  
ganahawavemogatalena be O hinahalamane.  
Tovetumagana adi yo'o hinafadiya  
O ganakweli-davadava.

<sup>13</sup> Kadu gahe sa'eyana ma gigayo,  
Iya tauku Yaubada againe ganavetumagana.  
Kadu gahe sa'eyana gigayo,  
We'a Yaubada natuneyao giveleku-ma  
iya badi buye amimiyami.  
Yesu ide buye kavetobohiyana ma ana gahegahe Veyao  
Tuwaina ana buki againe au hidede amine.

<sup>14</sup> Atu mena Yaubada natuneyao giyakahina-ma, ide kaliva vevine. Ada ide tomiyababi wawowoda wadayagida



fa'ina, kadu Yesu ada nuya gi'osena be givekaliva wawowona wadayagina. E, givekaliva be higa yana alika againe Setani alika give'inubena-ma ginaluyawelina be ginamididi-havagi yo Setani yana faiwala ginahavaina. <sup>15</sup> Kaliva vevine moya'aidi alika fa'ina himatamatauta, higa vaita alika ana matauta gidayogodi. Yesu gi'alika be Setani yana faiwala ginayawelina, ada gaveyao moya'aidi alika fa'ina tova moya'aina himatamatauta, medema ginakiyaudi be yadi matauta ginahavaina. <sup>16</sup> Yesu keke lobama ana tovenuwa'ata adi nuya gida'oseni be ginavelugadi fa'ina, keke. Ide kaliva Abelhamo bwanenenyao ada nuya gi'osena be ginavelugada fa'ina. <sup>17</sup> Ide taineyao ginavelugada fa'ina, gilubodana be kaliva ada nuya gida'osena ada ide babiya kamimiyami amine Bana gidamiyami be higa vaita abaveyao ana tofaisewa kikawabuna ide fa'ideya ginafaisewa. Ide ada ayauna moya'aina gi'ayaunena fa'ina, faisewai-nadi Bana anafaiweya gina'abi-hagihagiyena, kadu yana faisewa againe ginahinekalikaliyeda. Tova moya'aina Yaubada matane veyao ana eda againe ginagonagoyeda be higa Bana Yaubada buye kanaveyao fa'ina. E, Bana ide taineyao amine givekaliva fa'ina, anafaiweya yada koyona ana laufata giyawelini-yo Yaubada yana ila'a agaideya gihavaina. <sup>18</sup> Setani Yesu gi'aladibidibiyena againe aladibidibi ana faiwala kadu ana aulolo gi'ayaunena. Mena aladibidibi ana vita moya'aina gi'ayaunena tu gifaiwalahegehegena fa'ina, aladibidibi ide agaideya ginalakayemu ana toveya, Bana anafaiweya ginavelugada.

### 3

#### *Yesu Mosese gikaiwabuhegena.*

**2:18:** Hi 5:8-9 Mk 3:35 Sam 22:22 Ais 8:17-18  
4:1-11

**2:18:** 1Yn 3:8 Hi 4:15, Md

<sup>1</sup> Siule tobohiyakweyao, omi Yaubada yana yo'ogaga fa'ina gisevehailemi, ada kadu gikovami be aimo yana yo'o lobameya wanamiyami. Bana Yesu wananuwanunauyena, Bana'e Yaubada gi'iveninisena ada abaveyao ana tofaisewa kikaiwabuna ide fa'ideya gisena be Yaubada ana vetumagana ka'abi'abina-ma againe ginagonagoyeda. <sup>2</sup> Yesu mena faisewai-nadi fa'ina Yaubada givegidena-ma gibonabona'abiyena. E, tuwai-mo'ena Mosese Yaubada yana yo'o hinafadiya gi'idibumuhiga amine, meda anafaiweya tova moya'aina Yesu gi'idibumuhiga be Yaubada bonana matatabuna gi'abina. <sup>3</sup> Wa'ita, manuwa vewaga ana ita kaliva hinadavana tu manuwai-nadi ana to'aiyogona hinadava-mo'ena. Meda anafaiweya Mosese bana vaita Yaubada yana manuwa ana yowana amine ma kadavana, tu Yesu Tauna Yaubada yana manuwa ana to'aiyogona, higa yana yo'ogaga adi to'ihagihagi, kadava-mo'ena. Bana Mosese kikaiwabuna tu Bana Yesu kikaiwabu-mo'ena. <sup>4</sup> Manuwa sa'eyana sa'eyana keke tauna gidamidi, au kaliva hikivemididina. Meda anafaiweya Yaubada yana manuwa higa yana yo'o keke taudiyao hidatubuyemu, au Yaubada yana vehimeya againe hitubuyemu fa'ina Bana gaitoma moya'aidi inubadi. <sup>5</sup> Bana Mosese ma Yaubada ana agetoga, ada yana yo'o matatabudi hinafadiya bana bonabona'abina be gavaimi Yaubada yana nuwanuwa aimo tova mulina ginagaheyena, medema fa'ina gi'awatalatalaina. <sup>6</sup> Tu Bana Yesu ma keke Yaubada ana agetoga au Natuna, ada Bana bonabona'abina be Yaubada yana manuwa higa yana yo'ogaga agaidiya givehivimeya. Ada ide Yaubada yana yo'ogaga. Ka'i yada wa'asevatu kana'atuvefa'ila be gavadi aimo Yaubada ide fa'ideya ginagani-ma yada wavemwamwala kanalubodemmo'ena amine o, ide velemo'ena Yaubada yana yo'ogaga

kamimiyami.

*Kana'itave'avida be keke mi'sileli amine*

*Yaubada bonana kanaluhegehegeni.*

<sup>7-8</sup> Ka'i yada wa'asevatu kana'atufefa'ila, au ide vele-mo'ena Yaubada yana yo'ogaga. Fa'ina Alu'aluwa Mahalina Veyao Tuwaina ana bukiya gigahe amine kanahu-luva gigayo,

Boi tuwai-mo'ena bwanenemiyao babigaga againe hinunudadana ana toveya, badi tagadi hi'ivekuluna be Iya yadi Yaubada hivekwaulageku.

Kadu yaku atufefa'ila higuvaluvana.

Tu omi'iyao ma ka'i tova adamoya bonaku wananogalina o,

keke bwanenemiyao amine tagami wana'ivekuluni, au bonaku wanavenogalena.

<sup>9</sup> Mene babigaga againe badi bwanenemiyao yaku gugai malamala foti agaidiya hi'ita'itana.

Mena yaku gugai fifiwalana hi'ita'itana, tu tova moya'aina yaku atufefa'ila yadi dewa koyona againe higagaluvana, ada bonaku keke hidavenogaleni.

<sup>10</sup> Hidede amine hivekwaulageku fa'ina, badi kalivai-dina agaidiya ganuwakoyo.

Badi fa'idiya gagahe gagayo, Tova moya'aina tagadi kuluna

be eda tunutunugina hihegehegena ada yaku nuwanuwa hifanifaniyena.

<sup>11</sup> Fa'ina badi agaidiya ganuwakoyo lakahina ada gawonadabadaba gagayo,

Abaga fa'idiya gahawahegena-ma keke againe

hinaluku be agaikuya hinaveyawai, keke-mo'a.  
 Au hidede amine Yaubada yana buki againe miIsileli  
 fa'idiya gigae.

*Ka'i yada vetumagana kanahegena, keke kanaluku  
 Yaubada yana abageya.*

<sup>12</sup> Tobohiyakweyao, tuwai-mo'ena bwanenemiyao tagadi kuluna keke Yaubada yana abaveyawai againe hidaluku, fa'ina taumiyao wana'itave'avimi be keke tamo hakwadi agaimiya nuwanuwa koyona ase'asene ginadauda-yo yana vetumagana ginahegeni-yo Yaubada Tomiya-vagata ginavekwaulaugeni. <sup>13</sup> Yaubada ide

kaliva agaideya tova gihawahegena be againe bonana kanavenogalena. Tovai-nadi givewagana tova adamoya, ada tovai-nadi aimo gidadauda againe, tova tova buye wanave'akivetuvetunu be yami vetumagana againe wanafaiwala ada keke tamo hakwadi agaimiya dewa koyona nuwana ginavaini-yo tagana ginakulukulu.

<sup>14</sup> Boi tuwaina kavebutu Yesu againe kavetumagana. Ka'i yada vetumagana kanakive'avina, kana'atuvefa'ila kananunauwena yawaida ana aituheya, au ide velemo'ena Keliso buye kavetobohiyana. <sup>15</sup> Mena Yaubada yana gahe sa'eyana ahe gayakahina-ma kadu kana'itanuwenuwena, gigayo,

Boi tuwai-mo'ena bwanenemiyao tagadi hi'ivekuluna be Iya yadi Yaubada hivekwaulageku.

Tu omi'iyao ma ka'i tova adamoya bonaku wananogalina o, keke bwanenemiyao amine tagami wana'ivekuluni, au bonaku wanavenogalena.

<sup>16</sup> Ma gaveyao Yaubada bonana hinogalini tu hivekwaulaugeni? Au badi moya'aidi Mosese ginagoyedi

be Idifita hi'otayabuyabuna-ma kalivai-dina. <sup>17</sup> Kadu gaveyao agaidiya Yaubada ginuwauwakoyo malamala foti agaidiya? Au badi dewa koyona hififaisewani-yo hi'alika be luludi babigaga againe gi'iyauyaulena-ma kalivai-dina. <sup>18</sup> Ada kadu gaveyao fa'idiya Yaubada giwonadabadaba gigayo, Abaga badi fa'idiya gahawahegena-ma keke againe hinaluku be Iya agaikuya hinaveyawai, keke-mo'a? Au badi bonana keke hidavenogaleni-ma agaidiya hidede amine gigahe. <sup>19</sup> Badi yadi dewa koyona againe halamana kavaina. Keke Yaubada hidavetumaganeni fa'ina, abaga Yaubada yadi abaveyawai fa'ina gikidewedewena-ma againe keke adifaiweya hidaluku.

## 4

*Kanahawahegeda be Yaubada yana abaveyawai againe*

*kanaluku.*

<sup>1</sup> Boi tuwai-mo'ena Yaubada giwonadabadaba gigayo, “Yaku abageya wanaluku be Iya agaikuya wanaveyawai.” Badi bwanenedeyao ma yadi abaveyawai Yaubada gikidewedewena-ma againe keke hidaluku. Atu mena wonadabadaba veyawai fa'ina aimo gidadauda, fa'ina ide yada wamatauta kana'itave'avida be aimo keke tamo hakwadi agaimiya Yaubada ginagaheni ginagayo, “O keke unaluku be Iya agaikuya unaveyawai, fa'ina keke afata.” <sup>2</sup> Wanunuwanuwa Yaubada yana Venuwa'ata Yamumuna badi bwanenedeyao miIsileli hinogalina amine, kadu ide kanogalina. Badi venuwa'atai-nadi hinogalina tu hinogali-kawokawowona, au keke hidavetumaganeni fa'ina keke adi leme hidanuhagani. <sup>3</sup> Atu ide gaveyao Yesu kavetumaganena, medema veyawai ana eda amine kananauna be Yaubada againe kanaveyawai. Badi keke

hidavetumaganeni-ma fa'idiya Veyao Tuwaina ana buki  
againa gigahe gigayo,

Iya ganuwakoyo lakahina fa'ina gawonadabadaba gagayo,  
Abaga badi fa'idiya gahawahegena keke againa hinaluku  
be agaikuya hinaveyawai, keke-mo'a.

Hidedemi Yaubada gigahe tu boi tuwai-mo'ena veyawai  
ana vehimeya gisena, higa vaita Bana yana kaliva buye  
hinaveyawai. Fa'ina Bana babi gibubuna ada gaitoma  
moya'aina ana aibubuna givehavaini-yo Tauna giveyawai.

<sup>4</sup> E, hai buki-nadi againa aiyeta anaveseveni fa'ina gigahe  
gigayo,

Yaubada yana aibubuna moya'aina giluyabuni-yo  
aiyeta anaveseveni againa giveyawai.

<sup>5</sup> Kadu yana gahe ahe gayakahina-ma amine gigayo, “Keke  
Iya agaikuya hinaluku hinaveyawai.”

<sup>6</sup> Hidede amine gigahe ada badi tuwai-mo'ena Yaubada  
yana Venuwa'ata Yamumuna hinogalina-ma yadi  
abaveyawai againa keke hidaluku be Yaubada buye  
hidaveyawai. Keke bonana hidavenogaleni fa'ina keke  
hidaluku. Atu Yaubada abaveyawai gikidewedewena  
fa'ina, kaliva tufoida aimo kanaluku be Yaubada buye  
kanaveyawai.

<sup>7</sup> Yaubada nuwanuwana kaliva hinaluku  
fa'ina tova velugana gisena, ada tovai-nadi givewagana  
tova adamoya. Malamala a gavaiyehi kaliva hihege tu  
Yaubada Devida awane gigahe gigayo,

Ka'i tova adamoya Yaubada bonana wananogalina o  
keke tagami wana'ivekuluni, au bonana wanavenogalena.

<sup>8</sup> Tuwai-mo'ena Devida keke gidatubuyemu ana toveya,  
bana Yosua mi'sileli ginagoyedi be higa vaita abaga  
Yaubada yadi abaveyawai fa'ina gikidewedewena-ma  
againa gidavega'auledi. Ka'i Yosua gidavega'auledi  
be Yaubada buye vele-mo'ena hidaveyawai digo, keke  
muliya Devida yana toveya Yaubada veyawai ana tova

velugana fa'ina gidalukahihi. <sup>9</sup> Atu tova velugana muliya giyakahina fa'ina, kahalamanena ide Yaubada yana yo'ogaga yada veyawai aimo gidadauda. Yaubada aiyeta anaveseveni againe giveyawai amine, meda anafaiweya kadu ide yada veyawai kananuhagana. <sup>10</sup> Hai kaliva Yaubada againe ginaluku be ginaveyawai, medema yana faisewa ginasena be ginaveyawai Yaubada yana faisewa giseni tu giveyawai amine. <sup>11</sup> Yaubada yada abaveyawai gikidewedewena fa'ina, kanahawahegeda kanavedivediwe be Yaubada againe kanaluku Bana buye kanaveyawai. Keke bwanenedeyao amine kanadibutoyoga-yo kanabe'u, ada hidema fa'ina keke kanaluku.

*Yaubada bonana ana faisewa fifiwalana fa'ina.*

<sup>12</sup> Yaubada bonana gaitoma miyamiya-vagahina kadu fifiwala-vagahina. Hai fetu nigona luhei, medema sinasinahina ada luluda ana ihi hinagene anafaiweya ginaluku be kaviyuwa ginaseyemaunena. Atu Yaubada bonana vaita fetu sinasinahi-mo'ena amine gava nuwada gi'on-a'onana ada anafaiweya yada nuwahinage giluluve'u-ve'una be hadema yamumuna hadema koyona giseseyemaunena. <sup>13</sup> Keke tamo gavadi Yaubada againe adafaiweya kanasevauyeni. Au gaitoma moya'aidi lobameya kadu babiya gibubudi-ma kabu'avane Yaubada matane. Ide moya'aida yada nuwahinage matatabuna gi'ita'itana, ada mena yada nuwahinage fa'ina ginavedewayaugida.

*Yesu abaveyao ana tofaisewa kikaiwabuna ide fa'ideya.*

<sup>14</sup> Tu Yaubada yada nuwahinage fa'ina ginavedewayaugida fa'ina, yada vetumagana Bana Yesu Yaubada Natuna againe kanakidonena. Bana'e yada abaveyao

ana tofaisewa kikaiwabuna ada lobameya gilaka be Yaubada matane gimimiyami fa'ina, ada vedewayauga againe anafaiweya ginavelugada. Medema fa'ina Yesu ana vetumagana ka'awatalatalainena-ma kanakidonena. <sup>15</sup> Aladibidibi tulina tulina ide agaideya gilakayemu amine, kadu Bana yada abaveyao ana tofaisewa kikaiwabuna againe meda anafaiweya gilakayemu. Atu Bana'e ma keke ide amine koyona againe gidabe'u. Hidedemi aladibidibi gi'ayaunena fa'ina, Bana ide yada gakowakowa makewa'e anafaiweya gina'ayaunevaiseda be ginahinekalikaliyeda. <sup>16</sup> Yada abaveyao ana tofaisewa kikaiwabuna anafaiweya ginahinekalikaliyeda fa'ina, keke kanamatauta au yada wa'asevatu Yaubada Tokaiwabu-mo'a againe kanayemu be yana leme fa'ina kanave'o'ola. E, Bana Tokaiwabu-mo'a tu kadu Tonuwadoga againe kanayemu be higa yada koyona fa'ina ginahinekalikaliyeda ada keke matahiwadi ginaveleda, kadu tova vitana ide agaideya ginalakayemu amine, yana nuwadoga againe ginavelugada.

## 5

*Abaveyao ana tofaisewa kikaiwabuna ana vehimeya fa'ina.*

<sup>1</sup> Abaveyao ana tofaisewa kikaiwabuna babiya ana vegida fa'ina ganalukahihi. Bana'e ma tomiyababi, ada tobohiyaneyao fa'idiya Yaubada matane gilukuluku. Ada ana vehimeya Yaubada givelena-ma hidede amine. Kaliva yadi abahawahega tulina tulina kadu kevakeva higa kaliva yadi abaveyao Yaubada matane giseusena be yadi koyona ginayawelina fa'ina. Abaveyao ana tofaisewa kikaiwabuna sa'eyana sa'eyana adi vehimeya au hidede amine. <sup>2</sup> Kadu abaveyao ana tofaisewa kikaiwabuna



kaliva agaidiya gitubuyemu-ma gadowakowa gihalama-nena fa'ina, badi fanifanidiyao koyona againe hibe'u-ma gina'itadi amine, ginanuwanuwa ginagayo, “Ka'i kadu iya tamo tova badi amine ganabe'u.” Ada au hidedemi bana mena gadowakowa gi'ayaunena fa'ina anafaiweya bona bikabikana amine ginakivetuvetunudi. <sup>3</sup> Tamo tova bana gigadowakowa be koyona againe gibe'u fa'ina, gilubodana be tauna yana koyona fa'ina yana abaveyao Yaubada matane gidaseusena. Keke yana yo'ogaga yadi koyona fa'ina yadi abaveyao gidaseuseni, au kadu tauna yana koyona fa'ina giseusena. <sup>4</sup> Keke tamo hakwadi tauna gidakilakahini-yo abaveyao ana tofaisewa kikaiwabuna ana maka gidavaini. Bana Yaubada Tauna kaliva givegidena amine ana vehimeya givelena. Boi tuwai-mo'ena Yaubada kaliva sa'eyana ana egana Eloni givegidena be abaveyao ana tofaisewa kikaiwabuna yana faisewa give'abina amine, meda anafaiweya tova hinafane kaliva tulina tulina mena faisewai-nadi give'abidi.

*Yaubada Natuna givegidena be abaveyao ana tofaisewa*

*kikaibwabuna yana faisewa gina'abi-vagahina.*

<sup>5</sup> Atu bana Eloni keke tauna gidakilakahini, au Yaubada givegidena be abaveyao ana tofaisewa kikaiwabuna yana faisewa give'abina amine, meda anafaiweya kadu Bana Keliso keke Tauna ana egana gidakilakahini be higa vaita abaveyao ana tofaisewa kikaiwabuna ana maka gidavaini. Ada mena makai-nadi givaina ana toveya, Yaubada Bana againe gigahe gigayo,  
O'eni Natuku.  
Adamoya gahawavenatune.

Au hidede amine Yaubada Veyao Tuwaina ana bukiya Natuna fa'ine gigahe. <sup>6</sup> Kadu yana gahe sa'eyana ma gigayo,

Abaveyao ana tofaisewa ana maka

O againiya ginaduva-vagata.

Tuwai-mo'ena Abelahamo yana toveya

Melikisedeki mena makai-nadi

gi'abina amine, kadu O una'abina.

Au O'eni bana yana yo'o kalivana.

<sup>7</sup> Tuwaina Yesu babiya gimiyami ana toveya, Yaubada againe gikova'awafatafata. Yaubada alikeya anafai-weya ginalugolegolena fa'ina, yana watagiya Bana againe give'ove'o'ola be higa ginavelugana. Ada Yesu Yaubada againe gihawahegena be Bana agevavane gimimiyami fa'ina, yana ve'o'ola givenogalena. <sup>8</sup> Bana Yaubada Natuna nonogana tagiya aulolo ginuhagana. Mena yana tagiya yana aulolo againe bona'abi ana halamana givaina. <sup>9</sup> Bona'abi againe keke tamo gidakali'uho au ana vehimeya Yaubada givelena-ma fa'ina yana halamana gitubuga-mo'a. Hidedemi yana halamana ahe gitubuga-mo'a yo ide gaveyao bonana ka'abi'abina, medema ada kibababala ana eda gifaisewana be Yaubada buye kanamiyamiya-vagata. <sup>10</sup> Ada kibababala ana eda gifaisewana fa'ina Yaubada Tauna Bana givewagana gigayo, “O'eni abaveyao ana tofaisewa kikaiwabu, higa Melikisedeki yana yo'o kalivana.”

*Badi miHibeliu vaita we'owe'o amine, keke Yaubada*

*hidahalamane-hagihagiyeni.*

<sup>11</sup> Nuwanuwaku nuwanuwa moya'aina Keliso Melikisedeki ana hilafa fa'ina ganalukahihiyena. Tu tagami wa'ivekuluna be Yaubada yana nuwanuwa

keke agaimiya gidamadumahalini fa'ina, abaveyao ana tofaisewa kikaiwabuna ana vehimeya Keliso givaina-ma fa'ina keke ihayana ganakivetuvetunumi. <sup>12</sup> Wa'itami, tuwaina wavebutu Yesu againe wavetumagana, ada vaita adamoya yana nuwanuwa wadahalamane-hagihagiyeni yo fanifanidiyao wadavehawaledi. Tu omi aimo fanifanimiyo. Mene gavadi-yo Yaubada bonana inubana wavenuwauluyeni-yo tamo hakwadi ginavehawale-havagilemi? Omi vaita we'owe'o amine. Keke Yaubada wadahalamane-hagihagiyeni fa'ina, huhu fwefweya hihuhuna-ma meda anafaiweya Yaubada bonana ana nuwanuwa ihayanaga hinavehawalemi. Keke a'a o'olina lakahidiyao hi'au'ana-ma amine Yaubada bonana ana nuwanuwa vitana hinavehawalemi, fa'ina keke amifata. <sup>13</sup> Gaveyao huhugaga againe himimiyami, medema adi egana fwefweya. Ada fwefweya dewa yamumuna o dewa koyona aimo keke hidahalamaneni amine, vehawala dewa tunutunugina fa'ina keke amifata. <sup>14</sup> Atu a'a o'olina ma badi lakahidiyao adiga. Tovetumagana gaveyao Yaubada bonana ana halamana againe hive'asevatu, medema nuwave'uve'u fa'ina taudiyao hivehawaledi lauva tunugina yo nuwanuwa yamumuna kadu koyona adifaiweya hinaluve'uve'una.

## 6

*Keke Yaubada bonana inubanaga againe kanamiyami,  
au Keliso ana halamana againe kanave'asevatu.*

<sup>1</sup>Omi aimo fwefweya amine Yaubada bonana inubanaga againe wamimiyami fa'ina, nuwanuwaku hinafana kadu gina ana abalauyabu fa'ina ganakivetuvetunumi be moya'aida Yaubada bonana ana halamana matatabuna

againa kanave'asevatu. Keke Keliso yana vehawala inubanaga kananuwenuwani. Manuwa ivaguna kayogona againa, keke tova moya'aina ogola kadakikivemididini kadaya'iya'ini, keke-mo'a. Meda anafaiweya keke tova moya'aina vehawala tuwaina kamidivetumagana ana toveya kanogalina-ma kanalulumamaleni kanagayo, “Wananuwavilami be higa keke yami dewa koyona fa'ina wana'alika, ada Yaubada againa wanavetumagana.” Laumamala tuwaina inubanaga fa'ina wana'ilova. <sup>2</sup> Meda anafaiweya keke tova moya'aina vehawala tuwaina kanalulumamaleni, higa bafitaiso fa'ina, ada nima ana sewadi kaliva u'udiya fa'ina, ada to'alika yadi mididihavagi fa'ina ada vedewayauga be kaliva adi laufata againa tokoyona hina'alika-vagata ma fa'ina. <sup>3</sup> Ada Yaubada ginahawahegeku amine vehawala tuwaina gananyabuyabuna be vehawala Keliso ana halamana againa kanave'asevatu fa'ina ganalukahihi.

*Ka'i kaliva Yaubada Natuna hinavekwaulauge-mo'ena, keke*

*adifaiweya kadu hinahagaviladi.*

<sup>4-6</sup> Gavadi-yo yami ve'asevatu fa'ina ganavehawalemi? Me gaveyao tuwaina Yaubada ana halamana fa'ina nuwadi gimahalina tu muliya Yaubada Natuna hinavekwaulauge-mo'ena, medema keke adifaiweya kadu hinahagaviladi, keke-mo'a. Tuwaina badi kalivai-dina nuwadi gimahalina ada yawai-vagata Yaubada gihawahegena-ma hi'ayaunena. Kadu Alu'aluwa Mahalina badi ase'asediya giluku, ada Yaubada bonana againa yamumu hinuhagana, ada hida tova mahalina againa Keliso yana faiwala aimo tova mulina ginaseyemaunena-ma ahe hi'itahalamanena. Ka'i mena Yaubada yana mahalina ana gaitoma moya'aina hi'ayaunena tu hinanuwayewa-mo'a, hai tamo eda yo

Yaubada againe kadu hinahagaviladi? Keke yadi nuwav-ilana ana eda gidadauda, fa'ina mena yadi vekwaulauga againe hihuluhuluva vaita taudiyao Yaubada Natuna kadu hidakivekeloseni be yo'o matadiya Yesu hidahawave-laigeni.

<sup>7</sup> Tu todibumuhiga kadu tovekwaulauga-mo'a adi abaluvefota sa'eyana ganalukahihiyena. Ka'i tova moy-a'aina wehi ginalugalugaga be babi ginakivedubani-yo a'a tulina tulina ginakabu, au tofaha mena yadi babi yamumuna againe a'a tulina tulina adiga fa'ina hinanuhagana. Meda anafaiweya badi Yaubada ana halamana hi'ita'itave'avina-ma guwadi ka'itana ada Yaubada yana nuwakabubu hinunuhagana. <sup>8</sup> Tu badi Yaubada hivekwaulauge-mo'ena ma vaita babi koyona amine. Ka'i wehi ginalugalugaga tu aboda yogogaga faha againe ginakabu, medema kaliva hinakilowena ada ana ita ma vaita alatabutabu gidanuhagani. Ada au faha hinatuna be gina'alahi-'owona ada ginakoyo-vagata.

*Yada hawahega againe kana'atuefa'ila be gava yamumu*

*fa'ina Yaubada giwonadabadaba-ma kananuhagana.*

<sup>9</sup> Siule tobohiyakweyao, tovekwaulauga-mo'a fa'idiya hidede amine gagahe tu omi gahalamanemi higa Yaubada ana halamana wa'ita'itave'avina be kibababala ana eda amine wananauna. <sup>10</sup> Yaubada fa'ina wafaisewa kadu yami nuwanuwa Bana againe wasena. Tuwaina tobohiyamiyao Yaubada yana yo'ogaga agaidiya wavelugadi kadu tova adamoya aimo waveluvelugadi, ada mena yami veluga againe yami nuwanuwa Yaubada againe waseseyemaunena. Bana Yaubada kaliva tunutunugina fa'ina, mena yami hawahega Bana fa'ine keke ginavenuwauluyeni, au ami laufata ginavelemi.

<sup>11</sup> Yaubada fa'ina wahawahegemi ada nuwanuwaku lakahina moya'a'imiyao sa'eyana sa'eyana yami hawahega wananunauwena wananunauwena tu tova ginalauyabu be higa gavadi Yaubada omi fa'imiya ginagani-ma walulubodena, medema matatabuna wananuhagana. <sup>12</sup> Keke nuwanuwaku dibumi ginatoyoga. Nuwanuwaku badi yadi wavetumagana yadi wa'atuvefa'ila Yaubada againe himiyamiyave'avina-ma wanave'u'uledi, ada hidede amine gavadi yamumuna fa'ina Yaubada giwonadabadaba-ma badi hinuhagana amine kadu omi wananuhagana.

*Abelhamo Yaubada yana wonadabadaba givetumaganena amine, ide adafaiweya kanavetumaganena.*

<sup>13-14</sup> Wa'ita, boi tuwai-mo'ena Yaubada Abelhamo againe giwonadabadaba. Yana wonadabadaba againe hakwadi ana egana giyakahini? Keke tamo hakwadi gidamiyami-yo Yaubada gidakaiwabuhegeni fa'ina Tauna ana egana giyakahina gigayo, Wona velemona ganauwakabubuye ada a unumamomo hinamoya'ai. Iya Yaubada gagahe.

<sup>15</sup> Hidede amine Yaubada giwonadabadaba ada Abelhamo yana wa'atuvefa'ila gibodaboda-yo gavaimi Yaubada giwonadabadaba, medemi ginuhagana.

<sup>16</sup> Ka'i kaliva nuwanuwadi hinawonadabadaba, kaliva sa'eyana ana egana hinayakahina higa Yaubada, fa'ina Bana ana egana lakahi-mo'ena. Kaliva lakahi-mo'ena ana egana hiyakahina be higa moya'aidi hinahalamanena yadi gahe au velemono'ena, ada kadu keke tamo hakwadi yadi gahe anafaiweya ginavekwageyeni. <sup>17</sup> Yaubada yana leme fa'ina giwonadabadaba, ada nuwanuwana badi yana wonadabadaba guwana hinanuhagana amanadi

hinahalamanena yana gahe au velemo'ena, keke-mo'a ginayawelini. Medema fa'ina giwonadabadaba againe Tauna ana egana kikaiwabu-mo'ena giyakahina. <sup>18</sup> E, Yaubada yana wonadabadaba gisena kadu Tauna ana egana ana aiyakata gisena. Mena gaitoma luhei keke-mo'a ginayawelidi, ada mena Tauna ana egana ana aiyakata kadu yana wonadabadaba againe kahalamanena Yaubada keke-mo'a ginafwaya. Yaubada yana gahe toyogina ide agaideya hidede amine gisena fa'ina, ide ka'ota be Yaubada againe kaveu amanadi adafaiweya kana'asevatu toyogina, be gavaimi Yaubada yana leme fa'ina giwonadabadaba ada kalulauboda, medema kanakive'avina. <sup>19-20</sup> Mena Yaubada yana leme fa'ina giwonadabadaba ada ide kalulauboda-ma againe ase'aseda giluluve'avina. Mena ase'aseda ana abaluve'avina toyogina, keke vaita gina'akakini fa'ina Yaubada yana leme giwonadabedabena-ma keke kanalubode-wayogeni. Ada waka ana lomu lai againe hihegena be gikive'avina amine, ase'aseda ana abaluve'avina Yaubada yana abamiyami againe kahegena be gikive'avina. Hidei babiya abaveyao ana tofaisewa kikaiwabuna kaleko abaseboda gilauwaina be Yaubada yana abamiyami Vetawana Tabu-mo'a againe giluku amine, Bana Yesu Yaubada yana abamiyami lobameya againe giluku be ginalemeda, Bana wai ginagona tu ide wai kanamulina. Bana gimidiluku ada abaveyao ana tofaisewa kikaiwabuna ana maka givai-vagahina. Boi tuwai-mo'ena Melikisedeki mena makai-nadi gi'abina amine, tova adamoya Yesu gi'abi'abi-vagahina.

## 7

*Abaveyao ana tofaisewa ana egana Melikisedeki inubana.*

<sup>1</sup> Bana Melikisedeki inubana fa'ina nuwami ganatalafolena. Bana'e badi miSalema yadi kini kadu Yaubada Getane-mo'ane yana abaveyao ana tofaisewa. Bana Abelahamo gina kini tufoidi buye hilulugaviya ada gi'ivehamumudi. Gi'ivehamumudi gihavaina, gilowoga be giyewayewana tu bana Melikisedeki edeya gimaduhagana ada gigahena gigayo, “Abelahamo, gagahe vele-mo'ena Yaubada ginanuwakabubuye.” Hidedemi bana kaliva kikaiwabuna gigahe. <sup>2</sup> Ada Abelahamo lokoloko moya'aina gaviya againe giyabwana-ma bo'u teni amine gisedakana, ada bo'u sa'eyana Melikisedeki givelena. Tu Melikisedeki ana egana ana kaivila fa'ina kananuwanuwa. Nagona bana higa yegayegana ana kini. Ada kadu melala ana egana Salema ana kaivila ma niwalova. Bana Melikisedeki Salema ana tovehimeya fa'ina, kadu hivewagana niwalova ana kini. Ana egana luhei ana nuwanuwa au hidede amine. <sup>3</sup> Kadu tamana hinana adi egana Veyao Tuwaina ana buki keke gidayakahini, ada gaveyao bana bwanenenyao ma kadu keke gidayakahidi. Yana tubuga kadu yana alika ana aituha keke gidayakahini. Au bana Melikisedeki anafaiweya Yaubada Natuna tuwai-lokalokana gimiyamiya-vagata amanadi. Ada Bana Yaubada Natuna abaveyao ana tofaisewa ana maka gi'abi'abi-vagahina amine, meda anafaiweya Melikisedeki makai-nadi gi'abi-vagahina.

*Melikisedeki mali abaveyao ana tofaisewa gikaiwabuhegedi.*

<sup>4</sup> Wa'ita, bana Melikisedeki kaliva kikaiwabuna. Fa'ina yada kaliva lakahina Abelahamo, higa bwaneneda nagona, yana yabwana bo'u teni amine gisedakana be bo'u sa'eyana givelena. <sup>5</sup> Ada Abelahamo gaisena



sa'eyana muliya gitubuyemu-ma ana egana Livai wananuwenuwena. Livai bwaneneneyao abaveyao ana tofaisewa adi maka hivaina, ada Yaubada givehimeya be higa tobohiyadiyao agaidiya yadi gaitoma hivaivaina. Badi tobohiyadiyao kadu Abelahamo ana yo'o agaidiya hitubuyemu, au adi yo'o sa'eyana higa miisileli. Tobohiyadiyao yadi faha o yadi lokoloko bo'u teni amine hisesedakana tu Livai bwaneneneyao bo'u sa'eyana hivaivaina. Tobohiyadiyao nonogana bo'u sa'eyana vaita takesi amine hivaivaina. <sup>6</sup> Bana Melikisedeki ma keke badi Abelahamo Livai yadi yo'o agaidiya gidatubuyemu. Atu Abelahamo yana lokoloko ana bo'u sa'eyana givaina ada gigahena gigayo, "Abelahamo, o againiya gagahе velemo'ena Yaubada ginanuwakabubuye." Hidede amine bana kaliva kikaiwabuna gigahe. Bana Abelahamo againe Yaubada yana leme fa'ina giwonadabadaba tu Melikisedeki Abelahamo yana lokoloko ana bo'u sa'eyana givaina ada gigahenuwakabubuyena.

<sup>7</sup> Hidede amine gigahenuwakabubuyena ada ide kahalamanena bana togahenuwakabubu yana gahenuwakabubu ana tonogala gikaiwabuhegena. Bwaneneda Abelahamo kikaiwabuna tu Melikisedeki gigahenuwakabubuyena fa'ina, bana kaliva kikaiwabumo'ena. <sup>8</sup> Kadu'e badi abaveyao ana tofaisewa Livai againe hitubuyemu ada kaliva yadi lokoloko ana bo'u teni againe bo'u sa'eyana hivaivaina-ma hi'ali'alika. Bana Melikisedeki ma Abelahamo yana lokoloko ana bo'u teni againe bo'u sa'eyana givaina-ma wayawaina gimimiyami Veyao Tuwaina ana buki gigahe amine. <sup>9-10</sup> Ada kadu Melikisedeki Abelahamo edeya gimaduhagana be yana yabwana ana bo'u teni againe bo'u sa'eyana givelena ana toveya, bana Livai aimo gaisena Abelahamo hagaline gidauda, aimo keke gidatubuga. E, Livai aimo Abelahamo

hagaline gidauda fa'ina, adafaiweya kanagahe vaita Melikisedeki bo'u sa'eyana Abelahamo againe givaina fa'ina, kadu bana Livai againe givaina. Livai ana yo'o higa badi abaveyao ana tofaisewa tobohiyadiyao agaidiya bo'u sa'eyana hivaivaina, atu Melikisedeki vaita Livai againe gidavaini. Hidede amine Melikisedeki Livai againe givaina fa'ina, kahalamanena bana abaveyao ana tofaisewa Melikisedeki badi abaveyao ana tofaisewa Livai ana yo'o agaidiya gikaiwabuhegedi.

*Yesu mali abaveyao ana tofaisewa gikaiwabuhegedi,*

*Melikisedeki amine.*

<sup>11</sup> Tu Livai ana yo'o kalivai-dina abaveyao ana tofaisewa yadi faisewa hi'abina. Vehimeya tuwaina inubana ma badi abaveyao ana tofaisewa adi maka againe giyemu be kaliva hiveledi. Ka'i abaveyao ana tofaisewa Livai ana yo'o agaidiya yadi faisewa againe kaliva moy-a'aida hidakiveyevyegada be Yaubada buye kadaveyao-vagata digo, kadu abaveyao ana tofaisewa tulina keke ada lauboda. Tu keke kadaveyao-vagata fa'ina, abaveyao ana tofaisewa tulina a gilakayemu, ada keke Livai bwane-nena ana egana Eloni ana maka amine gidavaini, au Melikisedeki ana maka tulina amine givaina. <sup>12</sup> Yaubada abaveyao ana tofaisewa tulina gisena fa'ina, gilubodana be kadu vehimeya tulina gidasena. <sup>13-14</sup> Tuwaina vehimeya nagona againe Livai ana yo'o kalivai-dina abaveyao ana tofaisewa adi maka hivaina, ada Mosese Yuda ana yo'o kalivai-dina fa'idiya keke tamo gidagahe higa vaita abaveyao ana tofaisewa adi maka hina'abini-yo Yaubada yana atudidigeya abaveyao hinamunudi, keke-mo'a. Atu ide ahe kahalamanena mena abaveyao ana tofaisewa tulina Bana yada Kaiwabu Yesu ma keke Livai

ana yo'o kalivana, au Yuda ana yo'o agaidiya gitubuyemu. Abaveyao ana tofaisewa tulina yo'o tulina kalivana fa'ina, Yaubada vehimeya tulina giseyemaunena.

<sup>15</sup> Tu abaveyao ana tofaisewa tulina Melikisedeki amine ahe gilakayemu. Fa'ina yaku gahe abaveyao ana tofaisewa tulina kadu vehimeya tulina fa'ina a gimahali-mo'ena. <sup>16-17</sup> Bana Yesu ahe gilakayemu ada abaveyao ana tofaisewa ana maka givaina. Mena makai-nadi inubana ma keke vaita Bana Yesu Livai ana yo'o kalivana yo higa abaveyao ana tofaisewa yadi faisewa gina'abini, keke. Mena makai-nadi givaina-ma inubana yawai-vagahina yana faiwala againe gimimiyami, ada keke-mo'a gina'alika. E, yawai-vagahina yana faiwala againe gimimiyami fa'ina abaveyao ana tofaisewa ana maka givaina, Veyao Tuwaina ana buki gigahe gigayo, Abaveyao ana tofaisewa ana maka O againiya ginaduva-vagata. Tuwai-mo'ena Abelahamo yana toveya Melikisedeki mena makai-nadi gi'abina amine, kadu O una'abina. Au O'eni bana yana yo'o kalivana.

<sup>18-19</sup> Vehimeya tuwaina abaveyao ana tofaisewa fa'idiya ma yana faiwala keke, kadu keke ada leme mena vehimeyai-nadi againe kadavaini. Keke Mosese yana vehimeya againe yada yegayegana kadanuhaganiyo Yaubada buye kadaveyao-vagata. Fa'ina Yaubada eda ivaguna giseyemaunena be ide adafaiweya yada wavemwamwala kananuwanuwa kanagayo, “Yesu yana leme againe kanayegayega be Yaubada liline kanayemu.” Mena eda ivaguna Yaubada Yesu againe giseyemaunena-ma vehimeya tuwaina gitubutagona.

*Yaubada Tauna ana egana giyakahini-yo Yesu maka givaina.*

<sup>20-21</sup> Atu Yaubada keke abaveyao ana tofaisewa ana maka Yesu gidavele-kawowoni, au Tauna ana egana giyakahini-yo givelena. Livai ana yo'o kalivai-dina ma abaveyao ana tofaisewa yadi faisewa hivaina againe, keke tamo hakwadi Yaubada ana egana gidayakahini-yo adi maka hidavaini. Bana Yesu ma abaveyao ana tofaisewa ana maka givaina againe, Yaubada Tauna ana egana giyakahina gigahena gigayo, O'eni abaveyao ana tofaisewa ana maka una'abi'abi-vagahina.

Iya Yaubada hidede amine gawonadabadaba ada yaku gahe keke-mo'a ganayawelini.

<sup>22</sup> Au hidede amine Yaubada Tauna ana egana giyakahina be giwonadabadaba fa'ina, Yesu yana faisewa againe veyao ivaguna gina'itave'avina be ide Yaubada buye velemo'ena kanaveyao. Mena veyao ivaguna ma veyao tuwaina gitubutagona.

<sup>23</sup> Kadu badi abaveyao ana tofaisewa Livai ana yo'o agaidiya moya'ai-mo'edi, fa'ina hi'ali'alika tu adi hilafa himidimidi. <sup>24</sup> Bana Yesu ma gimiyamiya-vagata fa'ina, abaveyao ana tofaisewa ana maka gi'abi-vagahina, ana hilafa keke. <sup>25</sup> Bana gimiyamiya-vagata be ide fa'ideya Yaubada matane give'ove'o'ola toyogina fa'ina, ide gaveyao Yesu ana eganeya Yaubada liline kayemu, medema anafaiweya ginakibababale-mo'eda be tova moy-a'aina gina'ita'itave'avida.

*Bana Yesu abaveyao ana tofaisewa yamuyamumu-  
'owogina.*

<sup>26</sup> Yesu kaliva mahamahalina. Keke tamo koyona Bana againe gidadauda, au Toyegayegana-mo'a. Kadu Bana'e sevesevhailana, tokoyona adi yo'o tulidi, Bana tulina. Kadu lobama getane-mo'ane gilaka be Yaubada matane gimimiyami. Yesu ana ita'ita hidede amine fa'ina, Bana'e abaveyao ana tofaisewa ada lauboda-mo'a, fa'ina ada leme tulina tulina Bana anafata. <sup>27</sup> Kadu Bana'e keke mali abaveyao ana tofaisewa kikaiwabudiyao Li-vai ana yo'o agaidiya amine. Badi'iyao ma tova moy-a'aina abaveyao hififaisewana. Nagona taudiyao yadi koyona ana aba'aiyawela fa'ina yadi abaveyao hiseusena, tu mulina kaliva moya'aidi yadi koyona ana aba'aiyawela fa'ina hiseusena. Tu Bana Yesu ma keke gidahuluva badi amine. Bana'e keke Tauna fa'ine abaveyao gidafaisewani, au ide tokoyona fa'ideya gifaisewana. Kadu keke tova moya'aina abaveyao gidafifaisewani, au tova sa'eyanaga Tauna wowona ana hawahega againe abaveyao gifaisewa-vagahina, ada mena abaveyao moya'aida yada koyona ana aiyawela anafata. <sup>28</sup> Mosese yana vehimeya ana huluva ma kaliva sa'eyana sa'eyana abaveyao ana tofaisewa ana maka hivaivaina, ana hilafa ana hilafa amine. Badi tomiyababi kowakowadiyao. Mosese yana vehimeya lauva tunugina gidauda tu Yaubada Tauna ana egana giyahina be yana wonadabadaba againe Natuna givegidena be abaveyao ana tofaisewa kikaiwabuna ana maka gina'abivagahina. Badi tomiyababi ma kowakowadiyao yadi wakoyona tu Bana Yaubada Natuna ma Toyegayegana-mo'a, ada yana halamana veyao-vagata ana faisewa fa'ina gitubuga-mo'a.

## 8

*Yesu abaveyao ana tofaisewa kikaiwabuna ana maka*

*ide fa'ideya gi'abi-vagahina.*

<sup>1-2</sup> Tu yama lukahihi abaveyao ana tofaisewa kikaiwabuna ana maka fa'ina matana lakahina hidede amine. Abaveyao ana tofaisewa kikaiwabuna ahe alukahihiyena amine we'a ide fa'ideya gimimiyami. Bana'e lobameya gilaka digo Tokaiwabu-mo'a yana didiga'u'u i'atagine givetoga, ada wese lobameya Yaubada yana manuwa ana Vetawana Tabu-mo'a againe gififaisewa. Mena manuwai-nadi au Yaubada yana abamiyami velemo'ena ada Kaiwabu manuwai-nadi Tauna gikivemididina, au keke kaliva hidakivemididini.

<sup>3</sup> Kadu'e abaveyao ana tofaisewa kikaiwabuna sa'eyana sa'eyana adi vehimeya gidadauda, higa kaliva yadi abahawahega tulina tulina kadu kevakeva higa kaliva yadi abaveyao Yaubada matane hiseusena be yadi koyona ginayawelina fa'ina. Ada au gilubodana be yada abaveyao ana tofaisewa tamo gavadi yana abahawahega Yaubada againe ginasena, higa Tauna wowona. <sup>4</sup> Boi tuwai-mo'ena Mosese badi Livai yana yo'o kalivai-dina adi vehimeya giveledi, higa vaita abaveyao ana tofaisewa adi maka hida'abi'abini-yo abaveyao tulina tulina Yaubada matane hidaseuseni. Badi hiseusena fa'ina, ka'i Yesu babiya gidamiyami digo, Bana'e keke abaveyao ana tofaisewa adi maka gida'abini, fa'ina Bana keke Livai yana yo'o kalivana. <sup>5</sup> Boi tuwaina Mosese oya Sainai gilaka be Yaubada buye hilukahihi. Hilulukahihi tu vaita avayauna amine Yaubada yana manuwa lobameya gidadauda-ma gi'itana. Muliya falai lakahina Yaubada yana abamiya hidakivemididina ma Yaubada Mosese gikivetuvetununa gigo, “Unogali! Aba'ita boi oyeya gavehawale amine yaku abamiya ana gaitoma moya'aina medemi wanabubuna.” Ada au manuwa hikivemididina, ada mena manuwai-nadi ma manuwa lobameya gidadauda-ma anununa amine.

Keke manuwa-mo'ena au anununaga. Ada badi Livai yana yo'o kalivai-dina manuwa lobameya anununa babiya medede againe hififaisewa. <sup>6</sup> Atu Bana Yesu ma ana vehimeya abaveyao ana tofaisewa fa'ina givaina-ma badi Livai yana yo'o kalivai-dina adi vehimeya gitubuhegena. Meda anafaiweya Yesu Yaubada ide'eyao adahinafeya gimidi-yo giulayagiyagilida be veyao gi'ihagihagiyena ada veyao-nadi veyao tuwaina gitubuhegena, fa'ina veyao ivaguna ana wonadabadaba Yaubada Yesu awane giyakahina-ma, veyao tuwaina ana wonadabadaba Mosese awane giyakahina-ma gitubuhegena.

*Veyao ivaguna ana wonadabadaba fa'ina.*

<sup>7</sup> Veyao tuwaina ma keke wa'agevavana, fa'ina kaliva Yaubada yana vehimeya keke hida'itave'avini. Ka'i veyao tuwaina againe kaliva faiwala hidavaini-yo Yaubada bonana hida'abina digo, kadu Yaubada veyao anavelu keke gidaseni-yo veyao nagona gidatubutagoni. <sup>8</sup> Badi bwanenedeyao yadi dewa keke yegeyegana Yaubada matane fa'ina gigahedi gigayo,

Iya Kaiwabu gagahe,

Aituha gi'ela'ela be

veyao ivaguna gasena

badi miIsileli higa miYuda agaidiya.

<sup>9</sup> Veyao ivaguna keke veyao tuwaina

bwanenediyao agaidiya gasena-ma amine.

Boi tuwai-mo'ena bwanenediyao

Idifita againe gana gavega'auledi ana toveya,

yaku veyao agaidiya gasena.

Tu yaku veyao keke hida'itave'avini,

fa'ina gavekwaulaugedi.

Hidedemi Iya Kaiwabu gagahe.

<sup>10</sup> Kadu veyao ivaguna fa'ina Kaiwabu gigahe,  
 Tova tuwaina ginahavaini-yo  
 yaku veyao miIsileli adi yo'o agaidiya  
 hidede amine ganasena, higa  
 yaku vehimeya nuwadiya ganasena,  
 yaku kivetunu ase'asediya gana'etoladina.  
 Iya yadi Yaubada ganamiyami,  
 tu badi yaku yo'o hinamiyami.

<sup>11</sup> Tovai-nadi moya'aidi hinahalamaneku.

Kaliva sa'eyana sa'eyana  
 keke tawaneyao o taineyao  
 aku halamana fa'ina ginavehawaledi,  
 Gavadi-yo keke ginavehawaledi?  
 Me kaliva lakahina kadu kwamana kabisona  
 au moya'aidi hinahalamane-mo'eku.

<sup>12</sup> Gavaimi-yo Iya yadi Yaubada hinahalamaneku?  
 Badi tokoyona nonogana ganahinekalikaliyedi  
 ada yadi koyona ganayawelina be  
 keke kadu gananuwa-nunauyeni.  
 Hidede amine Iya Kaiwabu gagahe.

<sup>13</sup> Mena yana veyao givewagana veyao ivaguna fa'ina,  
 yana veyao nagona gikivetuwaina ada ana vehimeya gi-  
 havaina be gisena. Ada gavadi gavadi tuwaina, medema  
 ana faiwala havahavaina be tova kabisona ginayawowola.

## 9

### *Veyao tuwaina ana tafalolo-vehimeya.*

<sup>1</sup> Tu veyao nagona ana vehimeya Yaubada ana tafalolo  
 fa'ina gidauda, kadu manuwatafalolo tomiyababi  
 hibubudi-ma gidauda. <sup>2</sup> Falai lakahina Yaubada yana  
 abamiya hikivemididina, ana vetawana luhei. Vetawana



nagona againe lamufa noya'aina seveni, kadu beledi hawahawatana ana tolama buye gidauda. Mena vetawana hivewagana Vetawana Tabu. <sup>3</sup> Vetawana anavelu ma vetawana nagona wamuline gidauda, ada ana abaluku againe kaleko vewabana abaseboda fa'ina hivekukena. Vetawanai-nadi hivewagana Vetawana Tabu-mo'a. <sup>4</sup> Vetawana Tabu-mo'a hinagene tolama sa'eyana gidauda, gola againe hibubuna ada tolama tabone vanedimodimo ana egana inisenisi Yaubada ana hawadavadava fa'ina hikabuna. Kadu'e bokesi gola againe hikevana-ma gidauda, medema hivewagana Yaubada yana veyao ana bokesi, fa'ina bokesi-nadi hinagene kuga beyabeyadi luhei againe Mosese Yaubada yana veyao ana vehimeya teni gi'etoladidi-ma hidauda. Kadu nau'a gola againe hibubuna-ma bokesiya gidauda, ada nau'a hinagene a'a ana egana mana boi tuwaina lobameya gihobuhobu be bwanenedeyao hi'au'ana-ma a'ai-nadi gidauda. Kadu Eloni yana aiwala gi'akukuwana-ma buye gidauda. <sup>5</sup> Bokesi getane lobama ana kaliva luhei ofadi tunugina hikilumina, fafaline kadu fafaline. Hivewagadi selubimu, ada badi Yaubada yana mahalina ve'akinamanamalina ana iya'iyaya higa vaita Yaubada Tauna bokesi ana lubu againe gidavetoga. Mena lubu ma abaveyao ana tofaisewa kikaiwabuna yomuyomu dayagidi againe gikiveduedubana be higa Yaubada kaliva yadi koyona ginayawelina. Ada badi selubimu mena Yaubada yana abavetoga againe koyona gi'iyawela-ma abavetogai-nadi ofadiya hiluveyavavana. Atu tova adamoya mena gaitomai-dina ana nuwanuwa kabi'ona kabi'ona keke amafaiweya analukahihiyeni.

<sup>6</sup> Tu manuwa-tafalolo ana lokoloko ahe hikidewedewena gihavaina, aiyeta sa'eyana sa'eyana abaveyao ana tofaisewa adi loi vetawana manuwa

wamagigine hilukuluku be Yaubada ana hawadavadava ana vehimeya tulina tulina hififaisewana. <sup>7</sup> Atu abaveyao ana tofaisewa kikaiwabuna anakaibe vetawana hinagene-mo'ane gilukuluku, ada aiyeta sa'eyanaga malamala sa'eyana sa'eyana againe giluku. Kadu keke makagekagena gidaluku, au yomuyomu dayagidi ginauwena be Yaubada yana abavetoga giloveduedubana, higa tauna yana koyona ana aba'aiyawela fa'ina kadu manuwafu yadi koyona hifaisewafanina ana aba'aiyawela fa'ina. Abaveyao ana tofaisewa kikaiwabuna gilukuluku tu kaliva-kawowo ma keke. <sup>8</sup> Mena Vetawana Tabu-mo'a ana hawata lakahina againe Alu'aluwa Mahalina gikivetuvetunuda higa vaita abaluku Vetawana Tabu-mo'a againe aimo falifalina. Vetawana manawa wamagigine aimo gidauda againe, Vetawana Tabu-mo'a eda'awana gi'abodana ada kaliva-kawowo keke adifaiweya Yaubada againe hidaluku. <sup>9</sup> Manuwa-tafalolo tuwaina ana vetawana luhei tu abaluku Vetawana Tabu-mo'a againe falifalina au aba'ita ide kaliva hida aituhai-nadi kamimiyami-ma fa'ideya. Medema againe kahalamanena boi kaliva vita nuwafoudiya hi'ayaunena-ma keke gidahavaini. Gavadi-yo keke gidahavaini? Me tova moya'aina yadi abahawahega Yaubada ana hawadavadava fa'ina kadu yadi abaveyao yadi koyona ana aba'aiyawela fa'ina Yaubada matane hiseusena, tu vita nuwafoudiya aimo hi'aya'ayaunena. <sup>10</sup> Yadi abahawahega kadu yadi abaveyao hi'ali'aliyena be higa tafalolo-vehimeya tulina tulina tuwai-mo'ena Mosese givedi-ma hinadibumuhigena. Vehimeyai-dina ma a'a kevakeva fa'ina, bwai fa'ina, taudiyao adi kivebuta o yadi lokoloko ana ikolakola tafalolo-vehimeya amine fa'ina, au vehimeya hidevama wowodi ana ihagihagi fa'ina. Yaubada vehimeyai-dina wowodi ana ihagihagi

fa'ina gisena be hinunauwena tu vehimeya ivaguna higa nuwahinagedi ana ihagihagi ana tova ginalakayemu, au mena tova tuwaina ana vehimeya ginahavaina.

*Keliso dayagina gimadu be nuwahinageda gi'ihagihagiyena.*

<sup>11</sup> Atu veyao ivaguna ana miya hagihagina we'a ahe giyemu, fa'ina Keliso Tauna ahe gilakayemu, ada Bana'e abaveyao ana tofaisewa kikaiwabuna veyao ivaguna ana miya hagihagina ahe giyemu be gi'ita'itave'avina-ma kalivai-nadi. Hidei babiya abaveyao ana tofaisewa manuwa-tafalolo kaliva hikivemididina-ma againe hilukuluku be hififaisewa. Tu Keliso ma keke manuwai-nadi againe gidaluku, au Yaubada yana abamiyami wesei lobameya giluku. Mena abamiyai-nadi kaliva keke hidakivemididini higa keke hida babi ana gaitoma, au lobameya gidadauda. Ada kadu abamiyai-nadi babi ana manuwa-tafalolo gikaiwabuhegena kadu ana nuwanuwa gitubuhege-mo'ena. <sup>12</sup> Bana Keliso Yaubada yana abamiyami againe giluku ana toveya, keke manugose o ka'i bulumakau natudi dayagidi gidanunauweni-yo abaveyao ginafaisewani fa'ina. Au tova sa'eyanaga Bana Tauna dayagina gimadu-yo Vetawana Tabu-mo'a higa wesei Yaubada matane-mo'ane giluku-vagata, ada medede amine ide yada dewa koyona fa'ina yogoyogonideyao kamiyami-ma gitutuvehobuda, e gitutuvehobu-vagahida.

<sup>13</sup> Boi tuwaina Mosese bwanenedeyao wowodi ana yegayega Yaubada matane fa'ina vehimeya giveledi. Ka'i tamo hakwadi gaitoma ali'alikana gidakibwa'ena digo, bana gidavebwanene Yaubada matane. Au abaveyao ana

tofaisewa manugose kadu bulumakau hala gidamunudi be dayagidi gidavaina o ka'i bulumakau ama gidave'ala-owodi be adi ali'au gufa wanau'ana againe gidadodona digo, badi hivebwanene Yaubada matane ma gidakivedubadi be higa hinayegayega. Ada medema kaliva wowodi ana ihagihagi fa'ina, keke vaita nuwadi ana ihagihagi fa'ina. <sup>14</sup> Yomuyomu dayagidi againe kaliva wowodi ana yegayega Yaubada matane hivaina. Atu Keliso dayagina yomuyomu dayagidi gitubuhege-mo'ena, fa'ina Bana'e yana koyona keke-mo'a tu Alu'aluwa miyamiya-vagahina yana veluga againe Tauna wowona Yaubada againe gihawahegena be gi'alika. Ada Keliso dayagina keke wowodaga gidakiveveveyegani, au nuwafouda gikiveveveyegana. Yada dewa koyona fatana alika ma fa'ina vita nuwafoudeya ka'aya'ayaunena, atu Keliso dayagina mena vitai-nadi givaihegena be nuwafouda gikiveveveyegani-yo Yaubada Tomiya-vagata againe kanavetofaisewa.

*Keliso dayagina gimadu fa'ina, Yaubada be kaliva*

*adahinafeya gimidi be giulayagiyagilida.*

<sup>15</sup> Tu Keliso dayagina nuwafouda gikiveveveyegana fa'ina, Bana'e Yaubada be ide'eyao adahinafeya gimidi-yo giulayagiyagilida be veyao ivaguna gi'ihagihagiyena. Bana gi'alika be gaveyao moya'aida veyao tuwaina ana vehimeya kadibutoyogena fa'ina yogoyogonideyao kamiyami, medema gitutuehobuda. Ada au hidede amine Keliso veyao ivaguna gi'ihagihagiyena fa'ina, ide gaveyao Yaubada gikovada medema Yaubada buye

kanamiyamiya-vagata be yana lokolokofou miyamiya-vagahina ada du'u kananuhagana giwonadabadaba amine.

<sup>16-17</sup> Yada dewa sa'eyana ma, kaliva sa'eyana yana lokolokofou fa'ina ginanuwanuwa ginagayo, “Iya gana'alika ana toveya gaveyao hinavaini?” Hidedemi ginanuwanuwa tu gaveyao ginavenuwadadanedi be yana lokolokofou hinavaina, medema adi egana fefe againe gina'etoladina. Bana kaliva aimo wayawaina ginamiyami ana toveya mena fefe-nadi keke hina'itani, keke-mo'a. Atu yawaina ginahavaina be moya'aidi bana velemo'ena gi'alika ma hinahalamanena againe, au fefe hinahawana be gavaimi gi'etoladini medemi yana lokoloko hinafolakena. <sup>18</sup> Mena abaluvefota amine ide Yaubada yana lokolokofou ada du'u keke adafaiweya kadamadunuhagani, au Yesu gi'alika-yo kanuhagana. Meda anafaiweya Yaubana yana veyao nagona fa'ina hihuluva. Yomuyomu hiluve'alikadi digo dayagidi gimadu be higa gavaimi Yaubada giwonadabadaba, medemi ginalakayemu velemo'ena.

<sup>19</sup> Boi tuwaina Yaubada yana veyao nagona gisena ana toveya, bana Mosese vehimeya tulina tulina buki-vehimeya againe gidauda-ma matatabuna manuwafo agaidiya gilukahihiyena gihavaina, bulumakau kabi'odiyao kadu manugose dayagidi givaina digo gufa buye give'atutamo'aina au abaluhegebaiba againe buki-vehimeya kadu manuwafo giluledubadi. Mena abaluhegebaiba ma sifi kwafilina yabeyabeline hivetagovina be ai wamagana ana egana hisofa againe hifafana. <sup>20</sup> Giluledubadi tu gigahegahe gigayo, “Hida dayaga ma Yaubada yana veyao omi agaimiya gisena-ma ana iya'iyaya, higa gavaimi giwonadabadaba medemi ginalakayemu velemo'ena kadu gavaimi

givehimeyemi, amine wanahuluva velemo'ena.” Hidedemi Mosese gigawe. <sup>21</sup> Meda anafaiweya dayaga againe falai lakahina Yaubada yana abamiyami manuwai-nadi ana lokoloko-tafalolo moya'aina buye giloveduedubana. <sup>22</sup> E, wona velemona vaita kadagahe dayaga againe gaitoma moya'aina hikiveyevyegana buki-vehimeya gigawe amine. Ada dewa koyona fatana alika fa'ina, ka'i dayaga keke ginamadu digo kadu keke Yaubada kaliva yada koyona ginayawelini.

*Keliso Tauna wowona gihawahegena be dayagina gimadu fa'ina, Yaubada yada koyona giyawelina.*

<sup>23</sup> Hida kagahe tuwaina kaliva adi kiveyevyega kadu manuwa-tafalolo ana lokoloko-tafalolo buye kaliva babiya hibubudi-ma ana kiveyevyega ana vehimeya gidauda, higa yomuyomu hiluve'alikadi be dayagidi againe hikiveyevyegadi. Mena gaitomai-dina abalufefota higa vaita lobama ana gaitoma anunudi amine. Tu lobama ana gaitoma-mo'edi ma adi kiveyevyega yomuyomu dayagidi keke anafata. Au Yesu dayagina yomuyomu dayagidi gitubuhege-mo'ena be againe ide tokoyona yada abaluku Yaubada yana abamiyami lobameya fa'ina gikiveyevyegada. <sup>24</sup> Kaliva manuwa-tafalolo Yaubada yana abamiyami lobameya ma anununa hidei babiya hibubuna. Tu Keliso alikeya gimididi-havagi yo keke manuwai-nadi againe gidaluku. Au gilaka be lobama-mo'ena againe giluku ada medede againe ide ada veluga fa'ina Yaubada matane giyemu. <sup>25</sup> Abaveyao ana tofaisewa kikaiwabuna malamala sa'eyana sa'eyana agaidiya keke tauna dayagina au yomuyomu dayagidi ginunauwena be Vetawana Tabu-mo'a againe gilukuluku. Atu Keliso keke tova sa'eyana sa'eyana lobameya gidalukuluku-yo

Tauna wowona abaveyao amine ginahawahawahegeni, keke. <sup>26</sup> Ka'i malamala sa'eyana sa'eyana Keliso Tauna wowona alika fa'ina gidahawahawahegena digo, kadu babi ana abave'inuba againe gidavebutu be tova hidevama gidanunauwena aulolo tagiya tova moya'aina gidanunuhagana. Tu keke medede amine gidahuluva. Au tova hidevama higa hida aituha tuwaina ana abalauyabu againe tova sa'eyanaga babiya gihobu'ela be higa Tauna wowona abaveyao amine gihawahegevagahini yo yada koyona ginavaihegena. <sup>27</sup> Tuwai-lokalokana Yaubada vehimeya gisena gigayo, “Tova sa'eyanaga kaliva moya'aidi hina'alika. Hina'alika-yo Iya ganavedewayaugidi.” <sup>28</sup> Meda anafaiweya tova sa'eyanaga Keliso Tauna wowona ana hawahega againe abaveyao gifaisewana be higa kaliva moya'aida yada koyona ginawahinawena. Ada aimo tova anavelu ginahobu'ela. Keke koyona ana aba'aiyawela fa'ina ginahobu'ela. Au ginahobu'ela be ide Bana fa'ine kalulauboda-ma abakibababala againe ginanauweda.

## 10

*Yomuyomu dayagidi koyona ana aba'aiyawela keke anafata.*

<sup>1</sup> Tu Mosese yana vehimeya ma gaitoma haghagidi tova mulina hinalakayemu-ma vaita anunudi amine. Keke gaitomai-dina adi ita velemo'ena gidavehawaleda. Mosese yana vehimeya hidede amine. “Tova sa'eyana malamala sa'eyana sa'eyana againe yomuyomu yami abaveyao fa'ina wanaluve'alikadi be Yaubada matane wanasena.” Ada au malamala sa'eyana sa'eyana yadi

abaveyao hiseusena be tova inaga inaga hinunauwena, tu abaveyao-nadi badi Yaubada ana hawadavadava fa'ina Bana againe hiyemuyemu-ma keke anafaiweya nuwahi-nagedi gida'ihagihagiyeni be adi vita gidavaihege-'owoni, keke-mo'a. <sup>2</sup> Ka'i abaveyao tohawadavadava nuwahi-nagedi velemo'ena gida'ihagihagiye-vagahidi digo, keke malamala sa'eyana sa'eyana againe hidayewayewadi be yadi koyona fa'ina yomuyomu hidaluluve'alikadi. Ka'i yomuyomu dayagidi tohawadavadava yadi koyona gidayaweli-vagahina digo, aimo keke vita nuwafoudiya hida'ayauneni. <sup>3</sup> Tu malamala sa'eyana sa'eyana againe abaveyao fa'ina yomuyomu hiluluve'alikadi be againe kaliva yadi koyona fa'ina nuwadi gitalafolena. <sup>4</sup> Fa'ina bulumakau kadu manugose dayagidi keke anafaiweya kaliva yadi koyona ginayawelini, keke-mo'a.

<sup>5-6</sup> Yomuyomu dayagidi koyona ana aiyawela keke anafata fa'ina, Keliso babiya gidahobu'ela ma bona sa'eyana Veyao Tuwaina ana bukiya gidadauda-ma giyakahina, higa vaita Yaubada againe gidagahe gidagayo, O'eni-ma keke nuwanuwa kaliva yomuyomu hinaluluve'alikadi be a abaveyao hinafifaisewani, o ka'i a'a tulina tulina hina'aliyeni be yadi abahawahega hinaseuseni. O keke nuwanuwa kaliva yomuyomu hinakabukabudi be kevakeva gina'ala'ala-'owodi, o ka'i yomuyomu dayagidi ginamadumadu be higa vaita koyona ginayawelini. Medema keke nuwa gidakiveyamumuni, tu tomiyababi adi nuya uveleku be Iya wowoku ana hawahega againe O nuwa ginayamumu.



<sup>7</sup> Hidedemi ya nuwanuwa fa'ina, gagayo, Ho Yaubada, we'a gamimiyami be ya nuwanuwa ganadibumuhigena, buki-vehimeya againe Iya fa'ikuya tuwaina hi'etoladina amine. Hidedemi Keliso Yaubada againe gigahe. <sup>8</sup> Abaveyao tulina tulina Mosese yana vehimeya givehimeyedi. Hidede amine Yaubada givehimeyedi nonogana mena Keliso yana gahe gayakahina-ma gigayo, “O keke nuwanuwa kaliva yomuyomu hinaluluve'alikadi be dayagidi gina-madumadu o ka'i kevakeva-mo'edi ai gina'ala'ala-'owodi kadu yadi abahawahega hinaseuseni, ada medema againe keke nuwa gidayamumu.” <sup>9</sup> Hidedemi Keliso gigahe tu gigayo, “We'a gamimiyami be ya nuwanuwa ganadibumuhigena.” Au hidede amine abaveyao tulina tulina ana dewa gidabana be dewa ivaguna gisena higa Yaubada yana nuwanuwa ana dibumuhiga. <sup>10</sup> Yesu Keliso Tauna wowona gihawahegena be dayagina gimadu. Keke tova moy-a'aina gida'alika-havahavagi, au tova sa'eyanaga gi'alika be dayagina gimadu-vagata, ada medede amine Yaubada yana nuwanuwa gidibumuhigena fa'ina, Yaubada ide gikiveveyegada.

*Keliso dayagina koyona ana aiyawela anafata-mo'a.*

<sup>11</sup> Tova tova abaveyao ana tofaisewa sa'eyana sa'eyana Yaubada yana manuweya himidimidi be adi vehimeya hififaisewana. Tova tova yomuyomu hiluluve'alikadi be dayagidi gimadumadu, atu mena abaveyao-dina koyona ana aiyawela fa'ina keke-mo'a adifata. <sup>12</sup> Bana Yesu Keliso ma tova sa'eyanaga Tauna gi'alika be dayagina gimadu-vagata, ada mena abaveyao-nadi koyona ana aiyawela fa'ina anafata-mo'a tova inaga inaga keke ana abalauyabu.

Yesu abaveyao gifaisewana gihavaina, gina Yaubada i'atagine givetogana. <sup>13</sup> Medede againe tova adamoya gi-bodaboda tu nibaineyao ageyafayafane Yaubada ginasedi. <sup>14</sup> Ada au abaveyao sa'eyanaga higa Tauna yana alika againe ahe gise-vagahida yegayega-mo'edeyao Yaubada matane, ide nuwahinagedeya gifififaisewa be higa yada dewa mahamahalinaga kanaseseyemaunena-ma kalivaidana.

<sup>15-16</sup> Kadu'e Alu'aluwa Mahalina Keliso yana abaveyao sa'eyanaga yada yegayega-mo'a anafata ma gi'alakakila. Veyao Tuwaina ana bukiya Alu'aluwa Mahalina gihawave-mogatala gigayo,

Tova tuwaina ginahavaini-yo yaku veyao yaku kaliva agaidiya hidedemi ganasena, higa yaku vehimeya ase'asediya ganasena, yaku kivetuvetunu nuwadiya gana'etoladina. Hidedemi Iya Kaiwabu gagahe.

<sup>17</sup> Kadu Alu'aluwa Mahalina gigayo, Yadi dewa koyona ganayawelina be keke kadu gananuwa-nunauyeni.

<sup>18</sup> Ada au Yaubada yada dewa koyona ahe giyawelina be givenuwauluyena fa'ina, keke gidalubodani be yomuy-omu dayagidi ginamadu-yo higa koyona ginayawelini. Koyona ana aba'aiyawela ahe'i.

*Ve'o'ola againe Yaubada matane kanayemuyemu.*

<sup>19</sup> Siule tobohiyakweyao, Yesu dayagina gimadu fa'ina, ide yada wa'asevatu Yaubada matane-mo'ane adafaiweya kanayemuyemu. <sup>20</sup> Tuwaina kaliva moya'aidi Vetawana Tabu-mo'a kaleko vewabana higa abaseboda muline keke adifaiweya hinaluku. Tu tova adamoya mena abaseboda ahe gi'ahaina be abaluku Yaubada againe gi'ayauna

amine, Yesu vidona keloseya hihaina ada medema againe Bana Tauna abaluku ivaguna Yaubada againe giyauna. E, abaluku ivaguna kadu miyamiya-vagahina giyauna. <sup>21</sup> Kadu Yesu yada abaveyao ana tofaisewa kikaiwabuna, ada ide tovetumagana Yaubada yana yo'o gi'ita'itave'avida. <sup>22</sup> Abaluku yauyaugina kadu yada abaveyao ana tofaisewa kikaiwabuna we'a gimimiyami fa'ina, Yaubada liline kanayemuyemu. Yesu dayagina ase'aseda gikolana be vita nuwafoudeya ka'ayaunena-ma givaihegena, ada gufa yegayegana againe wowoda gi'ihagihagiyeni-yo Yaubada matane kanayemuyemu. Keke kananuwanuwaluga, au yada wa'asehawahega kadu yada wavetumagana Bana matane kanayemuyemu. <sup>23</sup> Ada Yaubada gavaimi ada leme fa'ina giwonadabadaba be ide kalulubodena, medema fa'ina kanahawavemogatala ada kadu yada lulauboda kanakidonena. Yaubada yana wonadabadaba amine ginagugaiyena fa'ina, adafaiweya kanavetumaganena. Medema fa'ina yada lulauboda kanakidonena.

<sup>24</sup> Kadu kanave'a'itanuwanuwa gavaiya'amine buye kanave'agahegahedona be higa nuwakabubu igibagiba tulina tulina agaidiya kanahawahegeda. <sup>25</sup> Tovetumagana tufoidi boi tafalolo againe hi'ela'ela-ma hi'ilova. Ide keke kana'ilova, au tova moya'aina tafalolo fa'ina kanavagavaga'auta. Keliso yana yewa'ela be vedewayauga ana tova giluluveda'ufo fa'ina, giluboda-mo'emi be wanavagavaga'auta be Keliso ana vetumagana fa'ina buye wanave'alu-lau'age.

*Keke Yaubada Natuna kanavekwaulaugeni.*

<sup>26</sup> Ka'i Yaubada yana nuwanuwa velemo'ena kahalama-nena be kavetumaganeni-yo kadibutoyogena ada dewa

koyona againe kahawahawahegeda tova moya'aina, hakwadi dayagina ginamadu-yo Yaubada yada koyona ginayawelini? Keke tamo. <sup>27</sup> Au gaitoma sa'eyanaga gidadauda, matauta. E, gavadi ide agaideya ginalakayemuma fa'ina kanamatautave'ine, higa Yaubada ginavedewayaugida be yada koyona ana laufata ginaveleda. Ide gaveyao Yaubada kavekwaulaugena, medema Yaubada yana ila'a vaita ai'ala'alata amine kananuhagana be kanabwavi. <sup>28</sup> Tuwaina ka'i kaliva sa'eyana Mosese yana vehimeya gidayawelina ada to'ita luhei o tohiye hida'awatalatalainena digo, tovedewayauga keke gidahinekalikaliyeni, au bana kalivai-nadi vehimeya ana aiyawela fa'ina gida'alika. <sup>29</sup> Mena kaliva Mosese yana vehimeya giyawelina-ma ana laufata lakahina, tu bana tovetumagana Yaubada Natuna givekwaulaugena-ma ana laufata wananuwenuwena aimo gavatubuga! Tova moya'aina dewa koyona againe gihawahawahegena fa'ina huluvai-nadi againe Yaubada Natuna givekwaulaugena, Yesu dayagina Yaubada yana veyao ana iya'iyaya be againe gikivemahamahalina-ma dayaginai-nadi gihawave'iyohoyohoyena, Alu'aluwa Mahalina nuwadoga givetalaiyena-ma gida'ihawadamanena. Mena dewainadi fa'ina ana matahiwadi lakahi-mo'ena ginanuhagana. <sup>30</sup> Fa'ina Yaubada a kahalamanena, Bana gigahe gigayo,

Iya'eku kaliva adi matahiwadi ganaveledi.

Iya ganalaufata.

Kadu yana gahe sa'eyana ma gigayo,

Iya Kaiwabu yaku kaliva ganavedewayaugidi.

<sup>31</sup> Ka'i Yaubada Natuna kanavekwaulaugena amine o ada matahiwadi Yaubada Tomiya-vagata nimane kananuhagana, ada medema fa'ina kanamatautave'ine be higa keke

Natuna kanavekwaulaugeni.

*Yada wavetumagana vita tulina tulina kana'atuvefa'ilena.*

<sup>32</sup>Tu gavadi gavadi tova tuwaina agaimiya hilakayemu-ma wananuwa-nunauyena. Bana Yesu ana halamana fa'ina nuwami gimahalini-yo Yesu nibaineyao hivebutu hikivekoyomi, ada aulolo tagiya lakahina ana vediwe againe wa'atuvefa'ila. <sup>33</sup>Tamo tova yo'o matadiya hi'i-hawadamanemi kadu hikivekoyomi. Tamo tova tobo-hiyamiyao hikivekoyodi tu badi lilidiya wamidi be wavel-ugadi. <sup>34</sup>Tufoidi Yesu hivetumaganena fa'ina deliya hisedi tu yami wahinekalikali wamadubodadi. Ada badi tokivekoyo hi'ela be yami lokoloko hidei babiya hile-mami againe keke nuwami gidakoyo, au wagahe waga-yo, “Ide yada lokoloko yamuyamumu-'owogina kadu miyamiya-vagahina wese lobameya gidadauda.” Ada au wavemwamwala.

<sup>35</sup>Medema fa'ina yami asevatu keke wanahegeni. Au wana'atuvefa'ila be aimo ami laufata yamumuna Yaubada ginavelemi. <sup>36</sup>Atuvefa'ila gilubodami be higa Yaubada yana nuwanuwa wanadibumuhigeni-yo yana la-ufata hagihagina giwonadabedabemi-ma wananuhagana. <sup>37</sup>Wana'atuvefa'ila fa'ina Veyao Tuwaina ana buki gigahe gigayo,

Tova kabiso-mo'ena Bana'e ginahobu'ela amanadi gina'ela. Keke ginavekwalu.

<sup>38</sup>Atu yaku kaliva yegayegadiyao vetumagana againe hinamiyami.

Hai kaliva yana matauta fa'ina yana vetumagana ginasevauyena medema fa'ine keke nuwaku ginayamumu.

Hidedemi Yaubada gigahe. <sup>39</sup> Atu ide'eyao keke badi yadi vetumagana hisevauyeni-yo agolaufofola hinuhagana-ma kalivai-dina, au ide badi vetumagana againe hi'atuvefa'ila be kibababala hinuhagana-ma kalivai-dana.

## 11

### *Vetumagana ana nuwanuwa fa'ina.*

<sup>1</sup> Bana vetumagana hidede amine. Hai kaliva yana wavetumagana, medema ginuwave'avina be Yaubada gavaimi gigahe medemi makewa ginanuhagana. Kadu gavadi gavadi hidadauda tu keke anafaiweya matane gina'itadi, medema ginuwave'avina vaita gaitomai-dina velema'ena hidadauda be aimo gina'itadi. <sup>2</sup> Tuwai-mo'ena bwanenedeyao gaveyao Yaubada hivetumaganena toyogina, Yaubada badi yadi vetumagana fa'ina gihawaveyamumuyedi. <sup>3</sup> Yada vetumagana againe kahalamanena lobama be babi matatabuna Yaubada yana gahe againe gilakayemu. Yaubada gaitoma moya'aina ka'ita'itana-ma gibubudi tu gaitomai-dina i'ibubunidi keke tamo gavadi ka'itana-ma againe gidabubudi.

### *Ide Hibeliu kaliva bwanenedeyao Ebeli Inoki Nowa*

### *yadi vetumagana kahihina.*

<sup>4</sup> Vetumagana ana abalufefota sa'eyana ma tuwai-mo'ena Ebeli yana wavetumagana fa'ina yana abahawahega higa yana sifi Yaubada againe gi'aliyena, ada Yaubada abahawahegai-nadi gihawaveyamumuyena. Tawagana Keni yana abahawahega higa yana faha Yaubada againe gi'aliyena tu Yaubada keke gidahawaveyamumuyeni. Yaubada bana Ebeli yana

abahayahega ana hawaveyamumu againe yana nuwanuwa gihawavemogatalena higa vaita gidagahe gidagayo, “Ebeli givetumaganeku fa'ina, bana kaliva yegayegana.” Ebeli gi'alika tu yana vetumagana valeyana aimo gidadauda be tova adamoya enohega giveleveleda.

<sup>5</sup> Kadu sa'eyana ma bana Inoki yana wavetumagana fa'ina keke alika gida'ayauneni, au Yaubada lobameya gisilakahina. Ada Yaubada givaivedamanena fa'ina, kaliva bana wowona hilele-wayogena. Tu aimo keke gidanauweni againe, Yaubada bana fa'ine gigahe gigayo, “Bana Inoki nuwaku gikiveyamumuna.”

<sup>6</sup> Ada ka'i keke yada wavetumagana, kadu keke-mo'a adafaiweya Yaubada nuwana kanakiveyamumuni. Hai kaliva nuwanuwana Yaubada matane ginayemuyemu, medema gilubodana be gidavetumagana vaita Yaubada gimiyamiya-vagata ada gaveyao Yaubada hilelelana, medema ginanuwakabubuyedi.

<sup>7</sup> Kadu bana Nowa yana wavetumagana fa'ina, Yaubada yana venuwa'ata vaita gavadi aimo ginalakayemu-ma givenogalena. Mena agolaufofola aimo keke gida'itani tu Yaubada yana gahe gidibumuhigena, ada waka gitallana ana unuma adi kibababala fa'ina. Mali kaliva keke Yaubada hidavetumaganeni tu Nowa yana vetumagana againe yadi nuwanuwa koyona ma giseyemaunena. Kadu Yaubada givetumaganena fa'ina, Yaubada bana fa'ine gigahe gigayo, “Bana Nowa kaliva yegayegana.”

*Abelhamo yana vetumagana kahihina.*

<sup>8</sup> Kadu'e bana Abelhamo yana wavetumagana fa'ina, Yaubada yana nuwanuwa bana againe gikovenana ana toveya givenogala, ada babi Yaubada giwonadabedabena

be higa aimo ginavelena babi-nadi againe gina. Ha'againe ginauna-ma keke gidahalamaneni tu au ai'adi yana melala gihegena be gina. <sup>9</sup> Yana wavetumagana fa'ina, babi Yaubada giwonadabedabena-ma againe vaita hawahawala amine gimiyami. Keke manuwa gidayogoni, au falai manugose kwafilidiya hibubuna-ma againe gimiyami be ginumiyamiyanana. Meda anafaiweya natuna Aisake kadu tubuna Yakobu falai againe himiyami, ada Yaubada babi-nadi fa'ina Abelahamo againe giwonadabadaba amine kadu badi agaidiya giwonadabadaba. <sup>10</sup> Abelahamo hawahawala amine falai againe gimiyami fa'ina keke gidanuwanuwa lakahina. Gilulauboda be abamiya miyamiya-vagahine ginaluku. Yaubada Tauna yana nuwanuwa amine mena abamiyai-nadi lobameya gikivemididina.

<sup>11</sup> Kadu'e Abelahamo givekaliva kadu Sela kakalina tu givesilakai nonogana Abelahamo yana wavetumagana fa'ina, vavinena Yaubada gifaiwalavelena be givehifuga. Hidedemi ginuhagana fa'ina Yaubada yana wonadabadaba givetumaganena. Yaubada giwonadabadaba vaita Sela natuna kaliva ginavenatunena ada Abelahamo gigayo, “Wona velemona Yaubada gavaimi giwonadabadaba medemi ginalakayemu.” <sup>12</sup> Ada au Sela hivehifuga. Moganedi Abelahamo givekaliva higa vaita keke anafaiweya kwamana gina'ivetubugini. Givekaliva nonogana bana againe bwanenenyao moya'ai-mo'edi hitubuyemu. Muliya adi yo'o vaita ibadibadi lobameya amine, kadu vaita makama taliyeya keke adafaiweya kanakilagalagani-ma amine.

<sup>13</sup> Tu badi Abelahamo ana unuma kalivai-dina aimo vetumagana againe himiyami tu hi'alika. Gavaimi Yaubada giwonadabedabedi, medemi aimo keke hidanuhagani tu yadi wavetumagana hi'alika. Keke hi-



danuhagani tu mena Yaubada yana wonadabadaba aimo lauveya giyemuyemu-ma nuwadiya hi'itana, ada medema fa'ina hivesiule. Ada taudiyao higahe vaita badi hawa-hawala amine hida babi againe hidanumiyanana. <sup>14</sup> Kaliva medede amine higahe againe, au kahalamanena taudiyao yadi melala hilelelena be againe hinamiyamiyavagata. <sup>15</sup> Ka'i melala hihegena-ma hidanuwa-nunauyena digo, kadu nuwanuwadi medede againe hidayewadi. <sup>16</sup> Atu melala hihegena-ma keke hidanuwa-nunauyeni, au nuwanuwadi mali melala yamumu-mo'ena higa yadi melala lobama againe hinamiyami. Ada au Yaubada kikaiwabu-mo'ena nonogana nuwanuwana Abelahamo ana unuma kalivai-dina fa'idiya Tauna givewagana gigayo, "Iya yadi Yaubada." Medema fa'ina yadi melala lobameya ahe gikidewedewena.

<sup>17-18</sup> Tu bana Abelahamo ma tauna boi Yaubada gigahena gigayo, "Bana natu Aisake kadu bwanenenyao agaidiya a egana ginayemuyemu." Muliya Yaubada Abelahamo gicaluvaluvana be higa ginahalamanena ka'i bonana gina'abina o ka'i keke. Gigahena gigayo, "Natu Aisake abaveyao fa'ina unaluve'alikana." Gigahe-yo Abelahamo gikidewadewa vaita natuna Yaubada againe ginahawahegena. Boi Yaubada bana againe giwonadabadaba higa vaita Aisake againe ana unuma hinamoya'ai, atu Yaubada givetumaganena fa'ina Aisake higa natuna anakaibe'u-mo'a keke gidanuwaloloni. <sup>19</sup> Nuwahnagene ginuwanuwa higa vaita Yaubada kaliva alikeya anafaiweya ginasivemididina, ada au natuna gidaluve'alikana ma Yaubada gihawatana. Hidema ana nuwanuwa ma vaita Aisake gida'alika tu alikeya gidamididi-havagi be tamana againe gidayewa'ela.

*Aisake, Yakobu, Yosefa yadi vetumagana kahihina.*

<sup>20</sup> Kadu bana Aisake yana wavetumagana fa'ina, natuneyao Yakobu be Iso gigahenuwakabubuyedi gigayo, “Aimo Yaubada ami'iselu ginanuwakabubuyemi.”

<sup>21</sup> Bana Yakobu yana wavetumagana fa'ina, gi'ali'alika tu Yosefa natuneyao adi'iselu gigahenuwakabubuyedi. Yana wavetumagana yana aiwaleya giliyaliyave'avina tu Yaubada gihahawadavadavana ada au gi'alika.

<sup>22</sup> Bana Yosefa yana wavetumagana fa'ina, yana alika ana tova giyemu againe yana yo'o miIsileli agaidiya gigahе vaita tova mulina Yaubada ginavega'auledi be Idifita hinanuyabuyabuna. Kadu vehimeya tauna luluna fa'ina giveledi, higa vaita babi againe aimo hinana-ma hinavetauna.

*Mosese yana vetumagana kahihina.*

<sup>23</sup> Kadu bana Mosese hinana tamana yadi wavetumagana fa'ina, Mosese gitubuga againe bana miIdifita adi tokaiwabu yana vehimeya fwefweya kaliva adi luve'alika fa'ina hidibutoyogena, ada Mosese vaikohi tohiye agaidiya hisevauyena. Kwamana ana ita hagihagi-mo'ena fa'ina, yadi wavetumagana tokaiwabu yana vehimeya keke hidamatauseni ada au hisevauyena. (Muliya feyawa againe hidodona digo gufeya hiseni-yo miIdifita adi tokaiwabu ana egana Felo natuna kwamayoku Mosese wafeyawana gufeya hinuhagani-yo hifayayena.)

<sup>24</sup> Atu bana Mosese yana wavetumagana fa'ina, ahe gilakata againe egana kikaiwabuna, higa hivewagana Felo natuna kwanayoku natudi ma eganai-nadi gidibutoyogena. <sup>25</sup> Gigahе gigayo, “Ka'i Felo yana manuweya ganamiyami digo, akufaiweya hida babi ana gaitoma hagihagina gananuhagana be yaku

wavemwamwala ganamiyami. Tu mena gaitomai-dina au havahavaina ada iya Yaubada yana yo'o kalivana fa'ina, keke nuwanuwaku Felo yana manuweya ganamiyami-yo Yaubada ganakiloweni. Au ganana Yaubada yana yo'o miIsileli agaidiya ganamiyami. Ka'i miIdifita miIsileli hikikivekoyodi amine iya hinakivekoyoku digo, hinakivekoyoku.”<sup>26</sup> Au hidede amine Mosese ginuwanuwa, fa'ina gihalamanena lokolokofou moya'aina miIdifita adi tokaiwabu yana manuweya anafaiweya ginavaina, tu medema gaitoma-kawowo bana matane. Gina miIsileli buye himiyami fa'ina, ihawadamana lakahina ginuhagana tova mulina Bana Keliso ginuhagana amine, tu medema gaitoma lakahina Mosese matane. Tova moya'aina Yaubada yana laufata hagihagina ginuwannauyena fa'ina, Keliso higa Yaubada yana Tovegida aimo ginahobu'ela-ma fa'ine kaliva yadi ihawadamana againe gihawahegena.

<sup>27</sup> Kadu Mosese yana wavetumagana fa'ina, keke miIdifita adi tokaiwabu yana nuwakoyo gidamatauseni tu Idifita ginuyabuyabuna. Gi'atu'atuvefa'ila fa'ina tova moya'aina gihuluhuluva vaita Yaubada gida'ita'itani, Bana'e ide keke adafaiweya kada'itani amanadi.<sup>28</sup> Yana wavetumagana fa'ina Yaubada yana vehimeya lobama ana tovenuwa'ata yana Abamaduviviya fa'ina gidibumuhigena. MiIsileli givehimeyedi be sifi kabi'ona hiluve'alikana digo yadi manuwa ana wanafali ana luhega dayagina againe hikiveduvedubana, be higa lobama ana tovenuwa'ata mena iya'iyaya gina'ita-yo ginamaduviviyedi be keke adi tomo'ainagona ginaluve'alikadi badi miIdifita adi tomo'ainagona ginaluve'alikadi amine.

*Vetumagana ana abaluvefota moya'aina miIsileli tulidi tulidi*

*kahihidi agaidiya gidadauda.*

<sup>29</sup> Kadu badi miIsileli yadi wavetumagana fa'ina, yadi ota lehaga ana egana Lehaga Yabeyabelina againe hiyemu-yo Yaubada yana gahe againe lehaga gi'awaina, fafaline fafaline gimidimidi tu miIsileli vaita avaleya amine hidamana. Tu miIdifita hivebutu hivenegadi againe lehaga gil'u amuedamadi be moya'aidi hitowa'alika.

<sup>30</sup> Kadu miIsileli yadi wavetumagana fa'ina, melala lakahina ana egana Yeliko againe hiyemu digo melala kwaune hilulaudeli be aiyeta seveni agaidiya hinunuwaliliuga-yo melala ana ala kugakugana tauna gibe'u. <sup>31</sup> Badi vineYeliko kwamayoku yamayamadadi ma adi egana Leyabi yadi wavetumagana fa'ina, keke badi miYeliko Yaubada hidibutoyogena-ma buye hida'alika. (MiIsileli Yeliko ana fafaliya hiyemu-yo kaliva adi'iselu hi'iveninisedi be hinaluyavaga.) Badi Leyabi mena tolauyavaga adi'iselu yadi manuweya hivega'auledi be hilugolegoledi fa'ina, badi kwamayoku-dina keke hida'alika.

<sup>32</sup> Tu kaliva moya'aidi yadi wavetumagana kahihidi aimo gidadauda tu ka'i ganalukahihiyena digo, tova ginahavaina. Badi kalivai-dina adi egana ma Gidiyona, Beleki, Samisoni, Yefeta, Devida, Samuwela kadu Yaubada bonana ana to'awatalatalaina tulina tulina. <sup>33</sup> Badi yadi wavetumagana fa'ina, tufoidi nibaidiyao agaidiya hilulugaviya be hi'vehamumudi, tufoidi nuwanuwa tunutunugina amine yadi yo'o hivehimeyedi, tufoidi gavaimi Yaubada giwonadabadaba medemi hinuhagana. Kadu tufoidi kevakeva manimaninidi adi egana laiyoni hi'ela vaita hinayovadi againe, Yaubada

awadi gikibodana. <sup>34</sup> Tufoidi yadi wavetumagana fa'ina, nibaidiyao ai'ala'alata toyogine hihegedi tu Yaubada ai giluvekwe'una. Tufoidi nibaidiyao hi'ela be yadi feto againe hinaluve'alikadi tu Yaubada gilugolegole. Tufoidi kowakowadiyao tu Yaubada gifaiwalaveledi. Tufoidi gaviya againe hifaiwala-mo'a be mali yo'o yadi tolugaviya hiluvilidi. Vevine tufoidi yadi wavetumagana fa'ina, Yaubada yadi to'alika gisivemidididi be giveleyewedi.

*Tufoidi yadi wavetumagana nonogana vita hinuhagana.*

<sup>35</sup> Atu kaliva tufoidi ma yadi wavetumagana nonogana nibaidiyao nimadiya himiyami tu hivebutu hiyogodi-yo hikivekoyodi higayo, “Ka'i Yaubada wanavekwaulaugena amine o anayaumi be wanana yami manuweya.” Tu badi higayo, “Keke Yaubada anavekwaulaugeni. Ka'i wanaluve'alikama digo, anamididi-havagi be Yaubada buye anamiyami hagihagina.” Ada au nibaidiyao hikikivekoyodi tu hi'alika. <sup>36</sup> Kadu tufoidi Yaubada againe hivetumagana fa'ina, nibaidiyao hihawavelaigedi ada himunukoyokoyodi, kadu bulava againe hiyogodi be deliya hihegedi. <sup>37</sup> Tufoidi yadi wavetumagana fa'ina hitutuve'alikadi, tufoidi sowa againe hibobolugadi, tufoidi feto againe hiluve'alikadi, tufoidi hiwavidi be yadi melala hihege-yo adi kaleko keke fa'ina sifi manugose kwafilidi hi'osena be hitogatogadadana, adiga keke, lokoloko keke, abadauda keke. Ada au tova moya'aina nibaidiyao hikikivekoyodi. <sup>38</sup> E, hiwavidi be babigaga againe kadu oyeya hinunudadana, vatuluma kadu gou againe hivemanuwa. Badi tomiyababi Yaubada keke hidahalamaneni-ma nuwadi gi'uyuyu-mo'a fa'ina,

**11:34:** Yem 14:21-31 Yos 6:12-21 Yos 2:1-21, 6:25  
3:23-27 1Kin 17:17-24, 2Kin 4:18-37

**11:34:** Dan 6:22 Dan

badi tovetumagana vaita iyohoyoho badi matadiya. Tovetumagana kaliva hagihagidiyao nonogana yadi yamumu mena kaliva koyodiyao hifaniyena be hiwavidi.

<sup>39</sup> Tu Yaubada mena kalivai-dina moya'aidi yadi vetumagana fa'ina gihawaveyamumuyedi be valeyadi kanogalina. Yadi wavetumagana nonogana gaitoma hagihagi-mo'ena badi ide tovetumagana moya'aida Yaubada giwonadabedabeda-ma keke hidanuhagani.

<sup>40</sup> Gavadi-yo keke hidanuhagani? Tuwai-lokalokana Yaubada kadu ide fa'ideya ginuwanuwa be yana vevai yamumu-mo'ena gikidewedewena, higa adi ihagihagi-mo'a keke hinamadunuhagani. Au yana vevai ana tova ginalakayemu againe badi'iyao kadu ide'eyao se'eyaine gina'ihagihagiye-mo'eda be mahamahalideyao Yaubada buye kanamiyamiya-vagata.

## 12

*Tova moya'aina Yesu kananuwa-nunauyena.*

<sup>1</sup> Ide gavaiyami? Badi kalivai-dina yadi wavetumagana galukahihiyedi-ma adi yo'o lakahi-mo'ena vaita buhibuhi amine himidififida be yadi vetumagana ana aba'ita ka'ita'itana. Badi vetumagana fa'ina aba'ita hidede amine hivehawaleda fa'ina, yada eda Yaubada giseyemaunena-ma againe kanamaduna. Ka'i hida babi ana gaitoma fa'ina kananuwanuwa lakahina, medema vaita kaleko gida'alagavida amine. Au kanavehalilina be kanasena be higa adafaiweya kanamadu-hagihagi. Kadu nuwanuwa koyona vaita bulava amine giyogoda-ma kanagolohina be Yaubada yana eda againe yada wa'atuvefa'ila kanamaduna. <sup>2</sup> Medede amine kananauna tu

Yesu kana'itadone-vagahina. Bana Yesu yada vetumagana inubana kadu yana veluga againe yada vetumagana ginatubuga-mo'a. Alike kelose againe abawowomumu lakahina. Atu Yesu ginuwanuwa gigayo, "Aimo vemwamwala lakahina Yaubada matane ganaruhagana fa'ina, kelose ana wowomumu keke ganaruhenuweni." Ada au kelose ana aulolo kadu ana wowomumu gi'atufefa'ilena be Yaubada yana didiga'u'u i'atagine givetogana. <sup>3</sup> Yesu wanunuwa-nunauyena. Kaliva koyodiyao yadi kivekoyo gavadawana tu gi'atufefa'iledi. Ka'i kaliva omi hinakivekoyomi, Yesu yana atufefa'ila wanunuwanunauyena be higa keke wowomi ginalogilogi keke yami asevatu ginahavaini.

<sup>4</sup> Yesu koyona ana dibutoyoga againe givedivediwe tu nibaineyao hiluve'alikana be dayagina gimadu. Omi wavedivediwe be higa koyona wanadibutoyogena, tu nibaimiyao dayagimi aimo keke hidavemaduhegehegeni. <sup>5</sup> Yaubada yana gaha sa'eyana nuwami ma'i gi'afolefolena o ka'i keke? Veyao Tuwaina ana bukiya gigahe vaita omi natuneyao gidalu'ageyemi gigayo, Natuku, Iya ya Kaiwabu matahiwadi abakivenuwavilana fa'ina gavele ana toveya, unavenogala, keke unamiya-kawowo. Iya gadakeye ana toveya, keke unawowologilogi.

<sup>6</sup> Gaveyao agaidiya yaku nuwanuwa gasena medema kivenuwavilana fa'ina gatafidi. Gaveyao gahawavenatunedi, medema gavematahiwadiyedi. Hidema fa'ina Iya yami Kaiwabu omi natukweyao gakivenuwavilami. Hidedemi Yaubada natuneyao adi kivenuwavilana fa'ina gigahe.

<sup>7</sup> Medema fa'ina aulolo tagiya wana'atuvefa'ilena wanagayo, “Yaubada gikivenuwavilaku.” Omi we'owe'o tamadiyao moya'aimi natumiyao watafitafidi be wanakivenuwaviladi fa'ina. Meda anafaiweya Yaubada gihuluva vaita omi natuneyao fa'ina, aulolo tagiya givelevelemi be higa ginakivenuwavilami. <sup>8</sup> Yaubada natuneyao moya'aida gitafitafida be ginakivenuwavilada. Ka'i omi keke gidatafitafimi digo, kadu omi keke natuneyao velema'ena, au vaita eda natuna tamana keke ma amine wamimiyami. <sup>9</sup> Kadu'e, tamadeyao ide kabi'odeyaoya hikivenuwavilada be kawowomumuyedi. Atu Bana Yaubada alu'aluwada Tamana fa'ina, yada wawowomumu lakahina bonana kana'abina be kanamiyami hagihagina. <sup>10</sup> Tamadeyao babiya tova kabisonaga ide kabi'odeyaoya gavaimi hinuwanuwa amine hitafitafida be hinakivenuwavilada. Tu Yaubada Tamada lobameya ada ihagihagi fa'ina gitafitafida be higa Bana kaliva mahamahalina amine ide mahamahalideyao kanamiyami. <sup>11</sup> Abakivenuwavilana kanuhagana ana toveya, ada ayauna keke hagihagina, keke kadavemwamwala. Tu muliya ka'i Tamada yana kivetuvetunu kanavenogalena, au guwana nuwanuwa yegayegana yada dewa againe kanaseseyemaunena ada yada wanuwayamumu kanamiyami.

<sup>12</sup> Ma aulolo tagiya againe Tamada gikikivenuwavilami fa'ina, nimami gi'amehomehona-ma wanakivefaiwalana, tugami gi'a'akulakulana-ma wanakivetoyogina be wana'asevatu Yaubada yana eda againe wananauna. <sup>13</sup> E, eda tubuyamuyamumuna againe wananauna be gaveyao hinuwanuwaluga vaita agedi felafelana amine, medema agedi keke wanavebahini. Au yami dewa hina'ita-yo nuwadi ginavesa'eya be hinanauna yamu-



muna.

*Taumiyaō wana'itave'avimi be keke Yaubada*

*wanadibutoyogeni.*

<sup>14</sup> Tova moyā'aina wanagagaluvaluva be kaliva moy-a'aidi veyao againe buye wanamiyami, kadu dewa mahamahalina wanahuluhuluvina. Ka'i yami dewa keke mahamahalina, kadu keke Kaiwabu wana'itani. <sup>15</sup> Yaubada yana nuwadoga givetalaiyena be higa adafaiweya kanadewadewa mahamahalina. Wana'itave'avimi be keke tamo hakwadi agaimiya ginakali'uho higa vaita Yaubada yana nuwadoga keke ginavivaini. Kadu wana'itave'avimi be keke tamo hakwadi agaimiya nuwanuwa golagolana walamina ginavegilili ada guwana ginayemu be moy-a'aidi agaidiya ginadamadamana. <sup>16</sup> Wana'itave'avimi be keke tamo hakwadi gina'udo. Kadu wana'itave'avimi be keke tamo hakwadi agaimiya bana bwaneneda Iso amine Yaubada ginavekwaulaugeni. (Wa'ita, Iso yana koyona hidede amine. Bana tomo'ainagona fa'ina vaita tamana Aisake yana lokolokofou kadu Yaubada yana veyao ana wonadabadaba guwana higa yana kaiwabu bana ginavaina.) Tova sa'eyana Iso mafu gilau-mo'ena ada ana du'u ma bana taina yana a'aya gikimonevedamanena. Yaubada yana wonadabadaba keke gidanuwenuwani. Au yana'a ana tova sa'eyanaga ginuwenuwena ada hidedemi Yaubada givekwaulaugena. <sup>17</sup> Ada wahalamanena muliya nuwanuwana tamana ginagahenuwakabubuyena tu gighena gigayo, “Auwe. Ahe taini gavelena.” Ada au tuwaina Yaubada givekwaulaugena fa'ina, keke gidavaini. Gitagitagi lakahina higa vaita yana vekwaulauga ginayawelina tu keke anafaiweya.

---

**12:13:** 1Ko 9:24-25 Hi 1:3, 3:1 Md 27:28-44    **12:13:** Gah 3:11-12 Ha 3:19  
2Veh 8:5    **12:17:** Lo 12:18 Ef 4:31 Aba 25:33-34 Aba 27:32-40

*Keke veyao tuwaina ana vehimeya againe wadamiyami,  
au veyao ivagune wamimiyami.*

<sup>18</sup> Tu omi'iyao ma ka'i nuwanuwami Yaubada liline wanayemu, keke bwanenemiyao mĩsileli tuwai-mo'ena hinuhagana amine omi wananuhagani. Badi gait-oma adifaiweya hina'itana o ka'i hinanogalina-ma liline hiyemu. Tuwai-mo'ena Yaubada oya Sainai getane gimiyami tu mĩsileli oya liline hiyemu. Oya againe ai'ala'alata lakahina siyona gilakalaka-ma hi'itana, kadu lobama gi'uyuyu be umalovana gisena ada mala'ayega gimadu. <sup>19</sup> Hiulega agona lakahina kadu Yaubada agona lakahina hinogalina, ada hidedemi Bana agona hino-galina againe himatautave'ine Mosese higahena higayo, "Auwe. Keke nuwanuwama Yaubada agona ananogali-havagileni." <sup>20</sup> Fa'ina Yaubada ahe gigahe gigayo, "Keke tamo hakwadi hida oya hawahawatana againe ginalaka. Ka'i ginalaka digo, wanatutuve'alikana. Ka'i kevakeva digo, au ai'adi wanatutuve'alikana." Mena Yaubada yana hawata fa'ina ase'asedi gi'akolukoluna. <sup>21</sup> Kadu Mosese tauna gaitomai-dina matamatauhidi gi'itadi againe gi-gahe gigayo, "Yaku wamatauta gavetavetatava."

<sup>22</sup> Tu omi veyao ivaguna ana vehimeya againe wamimiyami-ma Yaubada liline wayemu-yo keke oya Sainai againe wadana. Au omi oya Saiyoni higa Yaubada Tomiya-vagata yana melala againe wayemu, bana kavewagana lobama ana Yelusalema. Medede againe lobama ana tovenuwa'ata Yaubada ana davadava fa'ina yadi wavemwamwala hivaga'auta, adi yo'o lakahi-mo'ena keke adafaiweya kanakilagalagadi ma badi lilidiya wayemu. <sup>23</sup> Omi badi Keliso yana yo'o agaidiya himidiluku be adi egana lobama ana buki againe Yaubada gi'etoladina kalivai-dina lilidiya wayemu. Bana Yaubada kaliva

moya'aidi adi tovedewayauga ma liline omi wayemu. Badi kaliva yegayegadiyao hi'alika be alu'aluwadi hagihagidi lobameya himimiyami kalivai-dina lilidiya wayemu. <sup>24</sup> Omi Yesu liline wayemu, Bana'e Yaubada ide'eyao adahinafeya gimidi-yo giulayagiyagilida be veyao ivaguna gi'ihagihagiyena, ada Bana dayagina veyao-nadi ana iya'iyaya. Boi tuwai-mo'ena bana Ebeli dayagina gimadu againe ana toluve'alika laufata Yaubada nimane givaina. Tu bana Yesu dayagina Ebeli dayagina ana nuwanuwa gitubuhegena, fa'ina Yesu dayagina gimadu againe ide tokoyona yada koyona ana aiyawela Yaubada nimane kavaina.

*Yaubada aimo babi be lobama ginali'una fa'ina, yada wamatauta kanadavana.*

<sup>25</sup> Tova adamoya Yaubada ide agaideya gigahegahe. Wana'itave'avimi be keke wanadibutoyogeni. Tuwai-mo'ena miisileli Yaubada agona oya Sainai hidei babiya hinogalina tu yana vehimeya hidibutoyogena, ada au yadi dewa ana laufata keke adifaiweya hida'oseni. Tu ide'eyao ma Yesu Keliso lobameya gimimiyami-ma Yaubada yana venuwa'ata agaideya gigahegaheyena. Ka'i ide kanavekwaulaugena, yada dewa ana laufata keke-mo'a adafaiweya kana'oseni. <sup>26</sup> Tuwai-mo'ena Yaubada agona oya Sainai againe gikova ana toveya, babi gili'uli'u. Tova adamoya giwonadabadaba gigayo, "Tova sa'eya-mo'ena babi ganali'uli'una tu keke babigaga au kadu lobama buye ganali'uli'una." <sup>27</sup> Mena hifufu "tova sa'eya-mo'ena" ma ana nuwanuwa hidede amine. Gaitoma moya'aina i'ibubunidi ginali'udi-yo hinayawowola be higa gavadi gavadi keke-mo'a anafaiweya ginali'uli'u-ma ginaduva-vagata.

<sup>28</sup> Au hidede amine Yaubada gaitoma moya'aina ginali'uli'una tu ide yana melala keke-mo'a ginali'uli'u-yo ginayawowola-ma againe kanaluku be yana itave'av-ina againe kanamiyamiya-vagata fa'ina, kanavesiule ada au yada wawowomumu kadu yada wamatauta Yaubada kanahawadavadavana be hidedemi nuwana kanakivey-  
mumuna. <sup>29</sup> Yada Yaubada vaita ai'ala'alata amine. Ai'ala'alata gaitoma moya'aina gi'alayauyaulena amine, yada Yaubada gaitoma koyona moya'aina ginaluyaweli-  
'owona. Medema fa'ina yada wamatauta kanahawadava-  
davana.

## 13

### *Dewa hagihagina tulina tulina fa'ina gikivetuvetunudi.*

<sup>1</sup> Tu omi Keliso yana yo'ogaga againe wavetobohiyana fa'ina, tova moya'aina buye wanave'anuwanuwakabubu.

<sup>2</sup> Ka'i Keliso yana kaliva boi keke wada'itadi-ma mali mela-  
leya hinatauya be hina'ela, au badi agaidiya nuwami gi-  
nanauna ada yami manuweya wanavega'auledi be wana'i-  
tave'avidi. Boi kaliva tufoidi lobama ana tovenuwa'ata  
vaita wakawaka amine hi'ela-ma yadi manuweya hiveg-  
a'auledi be hi'itave'avidi. Hivaitana badi wakawaka ma  
kaliva-kawowo, tu muliya hihalamanena badi Yaubada  
yana tovenuwa'ata. <sup>3</sup> Tu badi tobohiyamiyao deliya  
himimiyami-ma wananuwa-nunauyedi vaita omi badi  
buye yogoyogonimiyao wadamiyami. Meda badi ni-  
baidiyao hikivekoyodi-ma wananuwa-nunauyedi vaita  
omi badi buye aulolo tagiya wadanuhagani.

<sup>4</sup> Ka'i omi naginagimiyao, medema hagihagina. Tu  
omi kaliva vavinemiyao agaidiya wanamiyave'avina  
be keke mali vevine buye wanadauda. Omi vevine  
moganemiyao agaidiya wanamiyave'avina be keke

mali kaliva agaidiya wananauna. Yaubada badi to'udo kadu yamayamadadadiyao matahiwadi ginaveledi.  
<sup>5</sup> Wana'itave'avimi be keke tova moya'aina mani nuwami ginavivaini. Gavadi gavadi agaimiya hidadauda, medema fa'idiya wananuwanuwa wanagayo, “Medema gaitomai-dina au akufata.” Au hidede amine keke mani wana'itanuwavaiyeni, fa'ina Yaubada ami itave'avina fa'ina Veyao Tuwaina ana buki againe gigahe gigayo, Keke-mo'a gananyabuyabu.

Keke-mo'a ganahege.

<sup>6</sup> Hidedemi Yaubada gigahe fa'ina, yada wa'asevatu adafaiweya kanagahe kanagayo,

Bana Kaiwabu aku toveluga,

keke ganamatauta.

Kaliva agaikuya gavaimi hinaga?

Keke ganamatausedi.

*Ami tonagona bonadi wana'abina be Yesu Keliso*

*againa wanaluluve'avina.*

<sup>7</sup> Badi ami tonagona boi Yaubada bonana agaimiya hilumamalena-ma wananuwa'udu'ududi. Yadi wavetumagana Yesu Keliso againe hiluluve'avina yadi alika ana maka. Au wananuwa-nunauyedi be yadi vetumagana wanave'uve'u'ulena. <sup>8</sup> Yesu Keliso au gimiyamiya-vagata ada keke tamo tova yana nuwanuwa tulina tulina. Au boi tuwaina gimiyami amine, meda tova adamoya gimimiyami kadu tova mulina ginamiyami tova inaga inaga keke ana abalauyabu.

<sup>9</sup> Omi'iyao ma taumiyao wana'itave'avimi be keke nuwanuwa tulina tulina o ka'i vehawala ivaguna againe

kaliva hinanuwa'abiyemi. Vehimeya o hawata ke-  
vakeva tulina tulina fa'ina hiyakahina higa vaita ke-  
vakeva ase'ase mi gina'ihagihagiyena. Tu kevakeva keke  
ase'aseda ginakivevatuni, au Yaubada yana nuwadoga  
medema ase'aseda ana abakivevatu. Fa'ina gilubodami be  
asevatu Yaubada againe wanalelena. <sup>10</sup> Badi abaveyao ana  
tofaisewa Mosese yana vehimeya himuliyena-ma yomuy-  
omu kaliva yadi abaveyao hiluluve'alikadi tu kevakeva  
tufona hi'au'ana. Tu yomuyomu koyona ana aba'aiyawela  
fa'ina hiluluve'alikadi-ma keke hida'u'ani, au kevakeva  
hikabuna be gi'ala-'owona. Tu ide Yesu kamuliyena-  
ma keke kevakeva againe leme kadanuhagani. Au Yesu  
Tauna yana alika kelose againe yada koyona ana aiyawela  
kanuhagana, ada badi aimo yomuyomu yadi alika againe  
leme hilelelena-ma keke adifaiweya Yesu yana alika  
againe yadi koyona ana aiyawela hinanuhagani.

<sup>11</sup> Abaveyao ana tofaisewa kikaiwabuna yomuyomu  
dayagidi Vetawana Tabu-mo'a againe ginunauwena be  
higa koyona ana aba'aiyawela ginafaisewana. Tu yomuy-  
omu kevakeva-mo'ena melala kwaune hikabukabuna  
be gi'ala'ala-'owona. <sup>12</sup> Meda anafaiweya Yesu abaga  
Yelusalema melala kwaune gina yana watagiya gi'alika be  
Tauna dayagine yana yo'ogaga gikivevevegegada. <sup>13</sup> Au  
hidede amine Yesu dayagina abaveyao tuwaina gitubu-  
tagona fa'ina, mena tafalolo tuwaina kananuyabuyabuna  
be Yesu ana tafalologaga againe kanadamana. Ka'i ide  
Yesu againe kaluluve'avina fa'ina kaliva ginakivekoyoda  
be wowomumu ginaveleda, au Yesu wowomumu giwahina  
amine ide kanawahina. <sup>14</sup> Hidei babiya melala againe  
kamimiyami-ma keke melala miyamiya-vagahina. Au  
melala miyamiya-vagahine aimo kanaluku melalai-nadi  
fa'ina kalulauboda.

<sup>15</sup> Ada au Yesu yada abaveyao ana tofaisewa kikaiwabuna ide fa'ideya Yaubada matane gimidimidi fa'ina, tova moya'aina yada abahawahega Yaubada againe kana'ali'aliyena. Keke yomuyomu kanaveleveleni, au yada davadava kanavelevelena. E, Yaubada ana davadava awadeya ginayemuyemu kanagayo, “Yaubada ana egana kikaiwabuna.” <sup>16</sup> Tova moya'aina nuwakabubu againe nuwami ginanauna be yami giba againe tobohiyamiyao wanaveluvelugadi. Ka'i medede amine wanahawahawahega, au vaita Bana'e wahawadavadavana ada mena yami hawahega fa'ina nuwana giyamumu.

<sup>17</sup> Tu ami tonagona bonadi wana'abina be agevavadiya wanamiyami. Yaubada adi vehimeya givedi higa alu'aluwami hi'ita'itave'avina, ada aimo tova mulina Yaubada ginavedewayaugidi ka'i hi'itave'avimi yamumuna o ka'i koyona. Medema fa'ina bonadi wana'abina be adifaiweya yadi wavemwamwala hina'itave'avimi, keke yadi wanuwavita. Ka'i yami dibutoyoga againe nuwavita wanaveledi, omi keke yamumu wanunuhagani.

<sup>18</sup> Tu ime fa'imeya wanave'o'ola. Ime anuwave'avina higa vaita yegayegameyao Yaubada matane adamiyami be keke tamo vita nuwafoumeya ada'ayauneni, ada nuwanuwama tova moya'aina anadewadewa hagihagina fa'ina wanave'o'olema. <sup>19</sup> Nuwanuwaku lakahina iya fa'ikuya wanave'o'ola toyogina be higa omi agaimiya ganamaduyewa'ela.

*To'etoladi yana lukafoi.*

<sup>20</sup> Tu iya omi fa'imiya hidede amine gave'o'ola. Bana Yaubada aseniwalova giveleveleda-ma ana Yaubada ginakivetoyogimi. Bana'e yana veyao miyamiya-vagahina

Yesu dayagine ide agaideya gisena. Yada Kaiwabu Yesu Keliso gi'alika be dayagina gimadu tu Yaubada alikeya gisivemididina be Bana ide yana sifi ada To'itave'avina lakahina gimimiyami. <sup>21</sup> Gave'o'ola be Yaubada nuwanuwa yamumuna tulina tulina againe ginakivetoyogimi be higa yana vehimeya wana'idibumuhigena. E, Yesu Keliso yana veluga againe nuwahnagemi gina'ihagihagiyena be gavaimi Bana matane gilubodana, medemi wanadewadewa. Ada Yesu Keliso ana egana kanakilakahina tova inaga inaga keke ana abalauyabu. Ehe hidedemi.

<sup>22</sup> Kafoi tobohiyakweyao, agaimiya ganave'o'ola. Wada'atuvefa'ileku be yaku kivetuvetunu hida yami leta againe ga'etoladina-ma wadanogali-hagihagiyena. Fa'ina keke vaita leta tunugi-mo'ena gada'etoladini, keke. <sup>23</sup> Tu nuwanuwaku wanahalamanena tobohiyada Timoti deliya gihobu. Ka'i iya agaikuya ginamadu'ela digo, bana ginavebwa'uliyeku be ama'iselu omi agaimiya ana'ela.

<sup>24</sup> Yama nuwakabubu ami tonagona moya'aidi agaidiya kadu Yaubada yana kaliva yana vevine mahamahalidiyao adi yo'o tulina tulina agaidiya. Badi tovetumagana fafali ana egana Itali kalivai-dina hilukafoiyemi. <sup>25</sup> Yaubada moya'aimi ginanuwadogemi.



**YAUBADA BONANA VEYAO IVAGUNA Bona Iduna**  
**The New Testament in the Iduna Language of Papua New Guinea**  
**Nupela Testamen long tokples Iduna long Niugini**

copyright © 1983, 2003 Wycliffe Bible Translators, Inc.

Language: Iduna

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-26

---

PDF generated using Haiola and XeLaTeX on 9 Sep 2021 from source files dated 19 Aug 2021

73458371-ad55-5c77-8b6b-5eca8d58f667